


verted by Tiff Combine - (no stamps are applied by registered version)



عبل لميّدجوده البنحار

مطبؤتان بكنية رهن

الحفيد

تأليف عبار لحميَّرجودَه السِّحار

(کٹناکٹ مکت بہمصیٹ ۳ شارع کا سل صلق ۔ انعمالۂ



فى سكون الليل انسل حسين إلى غرفة النوم وهو يترنح من التعب ، كان يرتدى بذلته السوداء وهى البذلة الوحيدة التى يملكها ولا تزال تحتفظ برونقها ، فهو لا يرتديها إلا فى المناسبات الهامة . وهل هناك مناسبة أهم من حفل زفاف ابنته الثانية ؟

إنه في ليلة زفاف أحلام سقط مغشيا عليه لما أقبل عليه شفيق وفي يده نبيلة وقال له: « أنا جاى يا عمى أطلب منك نبيلة » ، فما كان يقادر على أن يحتمل فكرة أن يقاسي ما قاساه من متاعب حتى زفت أحلام إلى جلال . إنها متاعب هدته هذا وجعلته يضيق بكل من حوله وما حوله . ولكن ما إن قال له شفيق إنه يريد نبيلة . يريدها بحقيبة ملابسها حتى أفاق من غشيته . وقد صدق شفيق وعده فقد جاء بالمأذون وفي حفل متواضع تم كل شيء . . عقد القران وأحذ زوجه وانصرف .

وعلى الرغم من أن الحفل اقتصر على أفراد الأسرتين فقد كان شيئا مرهقا ، لقد وقف طوال النهار يشرف على إعداد المائدة التي أعدت إكراما للعريس الذي أظهر من الشهامة ما أثلج صدره ، ويذب عنها عادية أولاده سوسن وعاطف وهالة ــ التي عرفت المشي ــ فكانت

تذهب إلى مفرش المائدة المتدلى على جانبيها وتجذبه بكل قوتها .

إن زوجته زينب لم تسمح للعروسين بالانصراف قبل أن ينتصف الليل ، فلما دقت الساعة المتواضعة المعلقة في الصالة الثانية عشرة نظر شفيق إلى حماته مستعطفا ، فإذا بالدموع تنهمر من عينيها وتقول في صوت مخنوق با لعبرات :

_ خلى بالك منها يا شفيق .

_ دى في عنتى يا تنت .


وحرج شفيق وقد أخذ ذراع نبيلة تحت إبطه و ذهبت زينب والأولاد خلفهما لوداعهما اوانسل هو إلى غرفة النوم يترنح حتى إذا ما بلغ السرير ارتمى عليه بملابسه وراح يملأ رئتيه بهواء يشده بأنفه شدا والزغاريد تدوى فى أذنيه .

وميز زغرودة من بين الزغاريد ؛ إنها زغرودة سامى . وهم بأن يقوم لينهره فما أصبح يليق بطالب قد عرف طريقه إلى الجامعة أن يزغرد . إلا أن تعبه جعله يعرض عن رغبة القيام وتعكير دمه في شخط ونطر وهو يريد أن يستريج طويلا .

ودخلت زينب الغرفة وهى ثوب السهرة . إنه ثوب غير ذلك الثوب الذى حضرت به زواج أحلام ، لقد أصرت على أن تشترى ثوبا جديدا لفرح نبيلة ، ثوبا يليق بالمصاهرة الجديدة وما كان له إلا أن يخضع .

ورأته ممدودا في السرير بملابسه فتقدمت منه وراحت تخلع له الحذاء وهي تقول مداعبة :

_ أهو دلوقت لك حق تستريح . فقال وهو يحاول أن يخرج تعبه مع زفراته : هي فين الراحه دى ؟



- ح تستريح كتير .. كتير قوى لغاية سوسن ما تكبر وتجوزها . وكانت قد خلعت له حذاءه فذهبت تعاونه على أن يجلس في السرير لتخلع عنه جاكتة البذلة ، فقال وهي ترفعه :

ــ هو أنا لسه ح اعيش لما اجوز سوسن .. البركه فيكم بقى . فقالت وهي تخلع عنه الجاكتة :

_ والله ما حد ح يجوزها غيرك .. هو احنا لنا قيمه من غيرك . وراحت تفك الكرافتة وتعاونه على خلع القميص ، فلما صار القميص في يديها إذا بفائلته مرصعة بدوائر فارغة ... فقالت في إنكار :

__ بقى دى فانله تلبسها يا حسين ! فيها إيه لو تشترى لك كام فانله ؟


وأخذت تفك الحزام الجلد المثبت للبنطلون ثم أزرار البنطلون ، وقال :

_ منین یا حسره ؟! هو انا قادر اتلم علی قرش . حقك یا زینب تمسكی إیدك شویه ، لسه ورانا كثیر .

تتوقف عن فك أزرار البنطلون وتلتفت إليه في شيء من الغضب : ___ يعنى شايفني عماله أبعثر الفلوس شمال ويمين . والنبي لولا تدبيري ماكنا قدرنا نعيش .

وصمت وكست وجهه موجة من الأسى . إنه لا يريد أن يثير الزوابع ، كل ما كان يريده أن ينام .. أن يستريح . وفطنت زينب إلى ما اعتراه فأرادت أن تخفف عنه فقالت :

_ والنبى يا حسين ما تحمل هم ، ربنا كبير .. الأيام اللى جايه ح تفوت زى الأيام اللى راحت . كنت باقول لك دايما رزق البنات ورا الباب ما كنتش بتصدقنى . جالك كلامى بقى ؟





وراحت تخلع البنطلون وحسين يقول :

ــ دا ربنا سترها بكرمه .

فقالت له وهي تتجه إلى الشماعة لتعلق البنطلون وتعود بالبيجاما : ـــ ح يسترها على طول .

وعادت وقد وضعت جاكتة البيجاما على كتفها وأخذت تعد البنطلون لتدس رجليه فيه ، واستراح إلى ذلك التدليل الذى قلما استمتع بمثله طوال حياته الزوجية ، فرفع ساقه فى الهواء فتقدمت زينب وغطتها بإحدى رجلى البنطلون .. فأنزل الساق المرفوعة ورفع الساق الأخرى وهو يستشعر كأن أنامل رقيقة حانية تدغدغ عواطفه وإن كان كل

جسمه ينبض بالتعب .

وانتهت من إلباسه بنطلون البيجاما فجلس في السرير ورفع ذراعيه كطفل طيب يحاول أن يعاون أمه على إلباسه ملابسه ، فما أن أدخلت ذراعيه في كمى الجاكتة حتى استلقى على ظهره منهوكا والنوم يثقل جفنيه فيسدلهما على عينيه .

وزررت له أزرار الجاكتة ثم مالت عليه وقبلته قبلة خاطفة وقالت له :

ــ تصبح على خير . نوم العوافى . عايز حاجه قبل ما تنام ؟

وذهبت لتخلع ثوبها فإذا به يقول وهو يتثاءب :

ــ عايز استريح ومش عايز حد يصحيني ولو الدنيا ادربكت .

وما أن أنتهى من كلامه حتى جاءت من الغرفة المجاورة أصوات ثائرة . إنها أصوات أبنائه وكان من الواضح أنهم يتشاجرون ، فهب من سريره وانطلق غاضبا إلى مصدر الصوت وكان آتيا من غرفة أحلام ونبيلة ، فدخل إليها كالعاصفة . وأتت زينب خلفه مهرولة مفزوعة تسأل :

_ فيه إيه يا مقاصيف الرقبة ؟

رأى سوسن واقفة فى وسط سرير أحلام ، وعاطف واقفا فى سرير نبيلة عند رأس هالة التى نامت وقد انحسر ثوبها عنها حتى كشف بطنها ، إنها غارقة فى سبات عجزت الضجة من حولها عن أن توقظها أو تجعلها تتململ فى رقادها . ورأى سامى هائجا يمد يده لينزع سوسن من فوق السرير ، فلما سمع صوت أبيه يقول مستنكرا :

_ ما شاء الله ..

أعاد ذراعه الممدودة وأطرق ينتظر قضاء أبيه ، فأسرعت سوسن تقول :

ـــ الحق يا بابا . سامى ومراد عايزين ياخذوا أودة أحلام ونبيله بعد ما اتجوزوا .. مش الأوده دى للبنات ؟

فقالت زينب:

ـــ ومن قال غير كده ؟

فقالت سوسن في انتصار:

سامي .

فتقدم مراد وقال:

ـــ الأوده دى ما حدش ح ياخذها إلا أنا وسامى ، سامى بقى فى الجامعه عايز يذاكر في هدوء ، وأنا عايز برضه أذاكر .

فقالت سوسن في تحد:

ــــ من فلاحتك قوى ؟ا

فقال لها حسين ينهرها:

_ عيب يا بنت .

ثم التفت إلى سامي وقال:

ـــ الأوده دى للبنات .

فقال سامي متفلسفا ليظهر علمه واعتراضه:

_ آدى اللي خدناه من قاسم أمين .

_ و إيش حشر سي قاسم أمين جوز عمتك في الموضوع ده ؟ الراجل مسافر بره بقاله سنين .

فيلتفت حسين إلى زوجته ويقول شارحا:

ــ قاصده قاسم أمين محرر المرأة .

فقالت زينب معترضة ضائقة بهذا الزعم:

ـــ ما هي طول عمرها حره .

فقال مراد:

__ ما هو اللي تخن ودان الستات ، خلاهم يتعـروا في الشوارع ويتعلموا ويتزنقوا في الأتوبيسات .

فراحت زينب تلكزه في صدره بقبضتها:

ــ اخرس يا قليل الأدب .

فلم يعجبه أن تحجر أمه على رأيه فقال في انفعال:

ـــ هى كل حاجه فى الدنيا بقت للستات ؟! والله لما أكبرلا انا عامل جمعيه تطالب بحقوق الرجاله .

فقال عاطف دون قصد:

نــ وانت مالك ومال الرجاله ؟

فاستشاط مراد غضبا ولولا وجود أبويه لضربه ، فراح يتوعده من بعيد وعاطف يهزأ بوعيده ، كانت العيون وملامح الوجه والشفاء هي أدوات التعبير الصامت التي ما كان للأبوين عليها سلطان .

ودار سامي على عقبيه لينصرف غاضبا من ذلك القرار الجائير ،

وذهبت زينب لتغطى هالة ، وفطن الأب إلى ضيق ابنه بقراره فقال :

_ سامى ، تعال نتفاهم انت ما بقتش صغير .

فعاد سامي إلى حيث وقف أبوه وإن ظل مطرقا لا يرفع عينيه عن الأرض. قال حسين :

__ شوف یا سامی یا بنی ، إن واحده من إخواتك جت هی و جوزها حبو ایاتوا عندنا بباتوا فین ؟

فقال عاطف في حماس:

_ يباتوا معايا ..

فجالبته أمه من رقبته و هي تقول:

ـــ ما بلاش غلبه و لم لسانك ده اللي عايز قطعه .

وقال مراد وقد فطن إلى ما يرمي إليه أبوه:

ـــ وإيه اللي حيخليهم يباتوا عندنا ؟

__الظروف يا بنى بتحكم ، إن جم يباتوا عندنا ما فيش غير الأوده دى يباتوا فيها ، وساعتها ناخذ سوسن وهاله فى أودتنا . فهمت يا سامى ؟

فرفع سامي رأسه ونظر إلى أبيه في رضا وقال :

_ فهمت یا بابا .

وانسل سامى إلى غرفته وقد أخذ عاطف فى يده ، وتمددت سوسن فى سرير أحلام وقد أركبت ساقا على ساق وهمى تستشعر نشوة الانتصار ، وذهب حسين إلى غرفته وتبعته زينب ، وبقى مراد ينظر إلى

سوسن في غيظ فلما رأته قالت في شيطنة :

__ يحيا قاسم أمين محرر المرأة .

فأسرع إليها مراد وأخذ اللحاف ليكتم به أنفاسها ، فإذا بها تهم بالصياح :

_ يا ماما .

ففزع مراد وألقى اللحاف من بين يده وفر مرعوبا إلى غرفة البنين .

وقفت زينب في المطبخ تغسل الصحاف التي تناولوا فيها الغداء ، وجلس حسين يقرأ الصحف في الشرفة ، واجتمع الأولاد حول الراديو يسمعون إذاعة وصف إحدى مباريات كرة القدم ، وإذا بعاطف ينسل إلى المطبخ ويقول لأمه :

ـــ رايح اتفرج على الكوره في التلفزيون عند الجيران .

فقالت له :

_ بس ما تتشاقاشي .

وعرف أن ذلك تصريح له فراح يهرول خارجا ، فلقيته سوسن فقالت

له:

_ على فين ؟

ـــ ح اتفرج على الكوره في التلفزيون .

فانطلقت سوسن إلى أمها وقالت لها :

_ ح اروح مع عاطف.

فقالت زينب وهي مستمرة في عملها :

_لأ .

فذهبت سوسن إلى الشرفة حيث جلس أبوها وقالت:

ـــ بابا ح أروح مع عاطف أتفرج على الماتش في التلفزيون .

فقال لها دون أن يرفع عينيه عن الصحيفة التي كان يقرأ فيها :

- قولي لماما .

فعادت إلى أمها وقالت لها:

ـــ يا ماما أروح مع عاطف .

فقالت زينب في غضب :

ـــ قلت لأ يعني لأ .

ققفلت سوسن عائدة إلى أبيها وقالت:

۔۔ یا بابا ح اروح مع عاطف .

- قلت لك استأذني من ماما .. أنا ماليش دعوه .

فقالت سوسن لتثير كرامته :

ـــ إنت عايز تقول إنها بتمشى كلامها عليك !

ــ يا سوسن لازم تعرف إن هي المسئوله عن البيت ده .

وانسحبت وهي تستشعر أن أباها قد خذلها ، وعادت إلى المطبخ وقالت لأمها في توسل:

ـــ والنبي يا ماما أروح مع عاطف .

فأخذتها زينب بين يديها وهزتها في عنف وهي تقول لها في غضب :

۔۔ هو أنا ميت مره ح اقول لأ .

فانطلقت غاضبة إلى حيث جلس أبوها وقالت منفجرة :

ــ مش ح تطلق الست دى بقى وتريحنا .

ونحى حسين الصحيفة بعيدا ونظر إلى سوسن وهو يتصنع الغضب وإن كانت كل ملامحه تفصح حقيقة ما يحسه من انبساط ، وقال :

ـــ إنت عارفه لو ماما سمعتك ح تعمل فيكيي . إيه ؟

ــ عارفه .

ـ طب وقولتي كده ليه ؟

_ طهقت .

و خرجت زينب من المطبخ فرأت سامي ومراد ينصتان إلى الراديو في اهتمام ، فوقفت ترنو إليهما في حنان ثم قالت :

ــ بقى لو كان الماتش بيتذاع م التلفزيون مش كان أحسن .

فقال مراد بسخرية:

ـــ لو .. هو فين التلفزيون ده ؟

_ اطلبوا من بابا يجيب لكو تلفزيون .

فقال سامي في إنكار:

ــ هو ده معقول ؟

_ مش معقول ليه ؟ هو بابا عمره اتأخر لكو على حاجه .

فالتفت مراد إلى سامي وقال له :.

ـــ روح يا سامي قول لبابا يجيب لنا تلفزيون .

ـــ ما تروح انت .

__ لا .. انت أكبرنا ما يصحش اتقدم عليك .

_ أنا يا سيدى متنازل لك عن حقى ده .

فنهض مراد وراح يلملم شجاعته وذهب إلى حيث كان أبوه وأمه ترقبه من بعيد ، كان حسين قد أجلس سوسن على ركبتيه وكان يحاورها وكان حديثها فيه ذكاء جعل نفسه تصفو وقد انعكس صفاء وجدانه على صفحة وجهه ، فلما قرأ مراد الرضا في ملامح أبيه شد ذلك أزره فقال :

- __ بابا __
- _ نعم یا مراد ؟ '
- __ عايزين تلفزيون .

وأحس مراد كأنما أزاح جبلا عن صدره ، ولكن سرعان ما انكمش لما سمع أباه يقول في غضب :

_ بلاش مسخرة .

وكأنما فتح أمام سوسن بابا لم يخطر لها على بال فقالت :

_ مش ده يا باباأحسن ما نروح عند الجيران .

وأنزلها من على ركبتيه وقال لها:

ـــ روحي بلاش غلبه .

ورأت زينب أن الوقت أصبح مناسبا لظهورها على مسرح الأحداث ، فدخلت عليهم وهي تتظاهر بالبراءة وقالت :

_ فيه إيه ؟

استراح حسين لدخولها و لم يدر أنها القشة التي يتعلق بها الغريق فقال كأنما يلوذ بها ويلتمس منها العون : ــ تعالى شوفي ولادك عايزين إيه ؟

ولحق سامى بهم وإذا بسامى ومراد وسوسن يقولون فى صوت واحد :

ـــ تلفزيون ..

وفى فزع يلتفت حسين إلى زوجه ويقول كأنما يستغيث بها:

_ عاجبك كده ؟

فقالت زينب في هدوء :

ـــ ربنا يخليك لهم .

وأحس أنها خذلته فقال في ثورة :

ـــ يخليني ؟! وحجيب منين ؟

لمعت في ذهن سامي فكرة فقال:

_ نشتريه بالتقسيط .

وقال مراد :

_ بالتقسيط المريح .

والتفت إليه الأب وقال ساخرا :

ـــ بالتقسيط المريح ؟ وندفع القسط منين ؟

فقالت سوسن :

_ من مصروفنا .

وقال مراد مؤيدا:

ـــ من مصروفنا .. مش كده يا سامي ؟

(الحفيد)

فقال سامي وهو يهز رأسه موافقا :

ـــ كلنا موافقين طبعا .

و لم يشأ حسين أن يهزم فقال :

ـــ نفرض إنناح نوافق على الكلام الفارغ اللى بتقولوه ده ، ط المقدم ندفعه ازاى ؟

وحسب الرجل أنه وضعهم أمام مشكلة ، فإذا بالزوجة تقول :

_ أنا عامله جمعيه من الجيران وقبضتها .

فقال مراد فی فرح:

ــ برافو يا ماما ، يا أحسن ماما في الدنيا .

وأسقط في يد الزوج فقال غاضبا :

_ لا ، دى مؤامره .

وأيقنت زينب أن كل شيء قد أحكم فقالت وهي تنسحب

الداخل:

ـــ أنا مالى .. ولادك عندك اتصرف فيهم .

وغادرت زينب المكان فالتفت حسين إلى أولاده وقال :

ــ والمذاكرة ؟!

__ قبل الامتحانات بتلات شهور ما حدش ح يفتح التلفزير خالص .

وقال سامي مردفا:

ــده وعد شرف .

فقال حسين وهو يغادر الشرفة :

ده أبدا طول ما أنا عايش .

وضع التلفزيون في الصالة والتف الأولاد حوله وقد ارتسم البشر في وجوههم ، وراحت زينب ترنو إليهم في فرح فقد نجحت في أن تحقق لهم أمنية غالية . وما شذ عنهم سوى هالة ، كانت تداعب عروسة صنعتها لها أمها من خرقة بيضاء وبعض القش الذي تجمع لديها .

كان التلفزيون يعرض فيلما أجنبيا فلم يستحوذ على كل انتباههم بل ترك لهم فرصة الحديث والحوار ، قال مراد :

_ والله أنا اقدر أخلى التلفزيون ده سكوب

فقالت زينب في سخرية:

ــ أيوه ، خسره زى ما خسرت الراديو .

فقال مراد مدافعا عن نفسه:

_ الحق على اللي صلحته لكم .

فقالت زينب في مرارة:

__ كتر خيرك ، مش عايزينك تصلح حاجه . . ريح نفسك وريحنا . . تعرف لو تلعب في التلفزيون مش ح يحصلك طيب .

ورن جرس الباب الخارجي فنهضت سوسن وقالت في فرح:

ــ بابا .. بابا ــ

ُ وجرت إلى الباب وفتحته ، وما كاد يخطو إلى الداخل خطوة حتى قالت له في انشراح وهي تجذبه من يده :

ــ تعال اتفرج على التلفزيون .

ودخل على الأولاد وقد جلسوا يتابعون الفيلم فألقى عليهم نظرة ارتياح وقال :

_ السلام عليكم .

ولم يرد عليه أحد السلام بل قال له عاطف :

ـــ هش .

وفي صمت أفسحت زينب له مكانا إلى جوارها فتقدم وجلس ، وأدار عينيه في المكان فلمح هالة تلعب بعيدا فقال في عتاب :

_ هي هاله بس اللي مالهاش نفس 1

وذهب إلى حيث كانت هالة وحملها فى حنان وقبلها ثم عاد وأجلسها فى حجرة وراح يوجه نظرها إلى التلفزيون ، فإذا بالطفلة تسرتجف وتصرخ فى فزع ، ولفت خوفها أنظار إخوتها فانفجروا يضحكون .

ونهضت زينب وأخذت الطفلة وضمتها إلى صدرها تسكينا لروعها وراحت تهدهدها وتقول لها في حنان دافق :

_ اسم الله .. ما تخافیش یا روحی .

واستكانت الطفلة في حضن أمها ، وكأنما عز على زينب أن تظل واقفة فقالت :

:ـــانتو مش ح تتعشوا ؟

فقال سامي:

_ هاتي لنا العشا هنا .

ونظرت إلى زوجها فإذا به يهز لها رأسه موافقا فقالت :

_ تاكلوا إيه ؟

فقال حسين في عدم اهتام:

_ اللي تجيبيه ، اللي عندك .

ـــ أنتو ح تحيرونى ! ما تقولوا تاكلو إيه ؟

فقال مراد :

ـــ بيض .

فقالت كما اعتادت أن تقول:

ـــ هو کل يوم بيض ؟ هو انتو تعابين ؟

فقال حسین مؤیدا رأی مراد :

ـــ والله البيض ألذم الفراخ .

ـــ أعمله لكم سندويتش ؟!

فقال سامي معترضا :

_ لأ .. أنا احب اغمس .

وقال عاطف:

ـــ وانا .

ومدت يديها بهالة إلى حسين و قالت :

_ طب خد بنتك على ما احضر العشا .

ودهبت إلى المطبخ وعادت تحمل صينية عليها صفحة قلى فيها البيض وصحاف الجبن والزيتون وضعتها على منضدة صغيرة بينهم وبين التلفزيون . وراحوا يأكلون ويتابعون الفيلم . وأبت هالة أن يطعمها أبوها وأصرت على أن تأكل بيدها . وراحت تأكل فلما وجدت أن أصابعها قد تلوثت بالبيض تلفتت حولها فلم تجد أقرب من كرافتة أبيها تمسح فيها يدها ، فلم تتردد بل قبضت عليها وراحت تفركها بين أصابعها .

وفزع الأب وقال :

_ إيه ده ا .. إيه ده يا بنت ؟

وأحست هالة أنه ينهرها فبكت ، فما كان من زينب إلا أن خطفتها منه وضمتها إلى صدرها وهي تقول له :

_ خضيت البت .

فقال حسين وهو يحاول أن ينظف الكرافتة بمنديل أخرجه من جيب بنطلونه :

ـــ هو انا لاقيها منها واللا من سامي !

فقال سامي في استياء:

ـــ وماله سامي راخر ؟

ـــ هو انت مخلینی اتهنی علی کرافته .

ـــ حتى أنا ما بالبسى كرفتات .

__ ويوم الخميس والجمعه ؟

_ إيه يعني يومين في الجمعه .

وينظر حسين إلى المنديل الذى اتسخ ويرى أن يغيره ، فيذهب إلى غرفة النوم ويفتح الدرج الذى يضع فيه المناديل فيجده حاويا ، فيعود ثائرا ويقف عند الباب ويقول :

_ ولا منديل في الدرج ! أمال المناديل راحت فين ؟

فتقول سوسن دون أن تلتفت نحوه فقد كانت تحاول أن تتتبع الفيلم :

ــ أنا شفت سامي وهو بياخد منديل الصبح .

فتقول زينب:

_ أنا حطه تلات مناديل مكويه بإيدى .

فيقول حسين في غضب:

_ طب الباقي راحوا فين ؟

فتقول سوسن في بساطة :

ــعاطف خدواحد وأنا حت واحد .. يعنى نروح المدرسه من غير مناديل ؟

فيقول حسين وقد خفت حدة غضبه :

_ ما شاء الله ! .

ويذهب حسين ويجلس ليتابع القصة ، وما كاد يستقر في جلسته حتى قال له مراد :

- یا بابا انت مش ح تشتری لك شرابات ؟

فقال حسين في هدوء:

_ عندى شرابات كتير.

_ لأ .. ما عندكش .

_ و إيش عرفك يا سي مراد ؟

_ جيت آخذ شراب الصبح ما لقيتش.

يلتفت حسين إلى زينب فتحس أن في نظراته عتابا . فتسر ع بالدفا ع عن نفسها:

_ والله شراباتهم ومناديلهم في ادراجهم ، بس هم اللي عنيهم زايغه .

وساد الصمت ، كان يعرض على شاشة التلفزيون منظر غرامي .

وخفق قلب حسين ، كان يرجو أن ينتهي المشهد سريعا ولكن المشهد طال وانتهى بقبلة بين البطل والبطلة . ومن طرف عينيه راح يراقب أو لاده . . رأى سوسن وعاطف قد أطرقا في خجل أما سامي ومراد فقد أخذا يتابعان المشهد بكل حواسهما . والتقت عينا حسين بعيني زينب وما لبث حسين أن نهض وانصرف إلى غرفة النوم فقامت زينب وقلبها يدوي في صدرها وحوف قد غمرها وتبعته ، فلما أحس دخولها قال لها في عتاب .

_ عاجبك كده ؟ عاجبك الخساره دى ؟

_ خسارة إيه ؟ أنا ما اخفشي على ولادي ، أنا ولادي مؤدبين ، شفت سوسن وعاطف عملوا إيه ؟!

وراحت حوادث القصة تتتابع على الشاشة والأولاد يتتبعىونها ف

اهتمام ، فالقصة قد استولت عليهم وإن كانوا لا يفقهون من الحوار الدائر بين الممثلين شيئا .

وعاد البطل يقبل البطلة فإذا بعاطف يلكز سوسن بمرفقه ويقول ف انشراح : __علَّقها ! وقف حسين أمام المرآة يحلق ذقنه ، وسمع وقع أقدام بالقرب منه فالتفت فرأى مراد وفي يده صحيفة فقال :

_ هو الجرنال جه يا مراد ؟

ـــ أيوه يا بابا .

ــ طب تعال اقرالي صفحة الوفيات ، يمكن نعرف حد فيهم .

ففتح مراد صفحة الوفيات وتقدم حتى وقف إلى جوار أبيه ، وقبل أن يفتح فمه قال له حسين :

ـــ اقرا اللي مكتوب بالبنط الأسود كفايه .

فراح مراد يقرأ :

- محلس مدينة بلبيس .. مدرسة التجارة الثانوية بقطور .. الحرية الثانوية التجارية للمعلمين ببندر بثانوية التجارية للبنات بشبين الكوم .. اللجنة النقابية للمعلمين ببندر بنها .. أسرة مدرسة النصر بطلخا .. معهد دمياط الأزهرى .. مدرسة سلامون قبلي للبنات .

__ إيه ده يا مراد .. باقول لك صفحة الوفيات مش صفحة التربية والتعلم !

_ ما هي دي يا بابا صفحة الوفيات ، وده المكتوب بالبنط الاسود .

_ طب سيب الجرنال واتفضل انت .

وترك مراد الصحيفة وانصرف ، وما كاد مراد يخرج حتى دخلت زينب وقالت في هدوء :

__ أحلام وجوزها وحماها وحماتها ، ونبيلة وجوزها جايين يتغدو عندنا يوم الجمعه .

وترك حسين الحلاقة والتفت إليها وقال :

__ مين اللي قال لك ؟

ا _ أحلام بعتت لي .

_ قالت لك إنها هي واختها جايين في يوم واحد ؟

ـــ أيوه .

ونظر إليها فاحصا ثم قال نافد الصبر:

ـــ والله انت اللي روحتي عزمتيهم .

__ أنا .. أبدا والنبى دنا يا دوب خطفت رجلى امبارح ورحت دفعت قسط التلفزيون .

_ وبعتت لك أحلام إمتى ؟

ـــ امبارح العصر .

_ وما قلتليش بالليل ليه ؟

فقالت وهي تدور على أعقابها لتنصرف:

... قلت ما انكدش عليك قبل ما تنام .

وقبل أن تنصرف جاء سامي وقال :

ــ عايز تلاته جنيه .

ــ تلاته جنيه .. ليه ؟

_ كتاب جديد نزل امبارح في الكليه .

ـــ هو كل يوم ملازم جديده وكتاب جديد .

ــ ما هي الجامعه كده يا بابا .

وجاء عاطف يعدو وقال :

ــ عايز قرش .

فالتفت حسين إلى سامي وعاطف وزينب وقال:

ــ انتم مش قلتوا ندفع أقساط التلفزيون من مصروفكم .

فقال عاطف وهو يرفع كتفيه نافيا :

ـــ أنا ما قلتش .

وذهب حسين إلى حيث علق بذلته وأخرج حافظة نقوده وأعطى سامى ثلاثة جنيهات فانصرف شاكرا ، وأعطى عاطف قرشا فراح عاطف يقلب القرش فى يده ، ثم رفع رأسه ينظر إلى أبيه وقال :

ـــ انت مش شایف یا بابا إن القرش ما بقاش یشتری حاجه ؟ · فقال حسین و هو یدفع ابنه لینصرف :

ــ قول كده للحكومه .

وراح حسين يرتدى ملابسه ، وأرادت زينب أن تخفف عنه فقالت : ـــ عندى كام زغلول في السطح أدبحهم وكام فرخه ، أهم يسدوا

خانه يوم الجمعه .

_ تفتكري دول يكفوا مصطفى علوان ؟ دا عايز له هم كتير .

ـــ كله يدبر .. ديك رومى نحطه فى وسط السفره ، وكام فرخه وكام حمامه ، وشوية بفتيك وصينية رقاق ، ونحشى شوية ورق عنب ، وكان الله بالسر عليم .

ــ ولازم الديك الرومي ده ؟

_ دى أول مره يتغدوا عندنا ، عايزهم يقولوا علينا إيه ؟

وأطرق حسين قليلا ثم قال :

ــ وح يحلوا إيه ؟

ـــ هات معاك بالمره كام كيلو موز وكام كيلو برتقال ، وأنا عندى لبن ح اعمل رز بلبن .

وهز حسين رأسه يأسا وسخريةوذهب إلى مكتبه . كان يكتب أرقاما فى ورقة . إنها الأثمان التقريبية للأشياء التى سيشتريها . ولما انتهى من كتابة الأرقام وجمعها أخرج من جيبه حافظة نقوده وأخذ يعد ما بها ليطمئن إلى أن ما بقى معه يكفى لشراء ما أملى عليه .

وأعاد الحافظة إلى جيبه وشرد مفكرا فإذا بصورة زينب تطفو على سطح ذهنه ، وإذا بصوتها يرن فى وجدانه : والنبى لولا تدبيرى ما كنا قدرنا نعيش . . وكادت تستولى عليه كآبة إلا أنه نهض وهز رأسه فى عنف كأنه كان يطرد الأفكار السوداء التى كادت تهاجمه لتفترسه . وأراد أن يسمع نفسه صوت الرضا والاستسلام فقال فى صوت مسموع :

ـــ الله جاب الله خد .. الله عليه العوض .

وفى العصر كان حسين وأولاده فى السوق: حسين عند الخضرى ، وسامى عند الفاكهى ، ومراد فى الجمعية التعاونية ، وعاطف عند خبز قريب من البيت . وعادوا جميعا إلى الدار وهم يحملون ما اشتروه .. ورن جرس الباب فأسرعت سوسن وفتحته فإذا بحسين يدخل وهو يحمل لفائف بها بطاطس وقوطه وبسلة وجزر وقد أسند اللفائف بيده إلى صدره وفى يده الأحرى كرنبة ، وإذا بسامى يحمل موزا وبرتقالا ، ومراد يحمل ورقا به اللحم ، وعاطف قد رفع على رأسه كيسا به خبز . فلما رأت سوسن أياها صاحت :

۔۔ کرنب یا ماما .

فجاءت زينب مسرعة ، فلما رأت زوجها يكاد يختفي خلف ما يحمل قالت :

ـــ شايل كل ده ؟! إن شا الله ما انشال ولا اتاكل .

وأسرعت تأخذ الكرنبة من يده وتخفف عنه بعض ما يحمــل، وسارت إلى المطبخ وهي تقول:

- ـــ كان لازم يعني الكرنب .. هو كان وحمه ؟
 - _ ما لقيتش ورق عنب .
 - ـــ ما كانش لازم .

ووضعت الأم الأشياء في المطبخ ، وما كاد حسين يأخذ نفسه حتى قالت له :

ـــ والنبى يا حسين تروح تغير هدومك وتيجى تساعدنى فى تقشير البطاطس والجزر ، وانت يا سامى تفصص البسلة عبال ما اسلــق الكرنبة .

فقال سامي:

_ أنا عندى مذاكره .

ــ يعني حبكت النهارده ؟!

_ خلى مراد وسوسن يفصصوها .

_ مراد وسوسن ح يقشروا البصل .

قال مراد :

ـــ اشمعني أنا اللي اقشر البصل كل مره ؟

_ عشان تنضف الحبر اللي دايما في صوابعك .

وذهب حسين إلى غرفته وسرعان ما عاد ولبس فوطة المطبخ وراح يقشر البطاطس والجزر ، وترك مراد البصل ، وانسل الأولاد ليشاهدوا التلفزيون .

ووضعت الحلل على النار ، وخرج حسين وزينب من المطبخ يبدو عليهما الإجهاد ، ونظرت زينب إلى حيث تجمع الأولاد وقالت :

_ كفايه لعب بقى تعالوا نوضب السفره . اعملوا حاجه نافعه مره . فقام الأولاد فى تكاسل و ذهبوا للمعاونة فى إعداد المائدة ؛ إن مائدتهم صغيرة لا يمكن أن يجلس حولها كل المدعوين غدا فراحوا يفكرون فى وسيلة يمدون بها المائدة ، فأتوا بمائدة المطبخ ووضعوها إلى جوار مائدتهم

وغطوا المائدتين بمفرش أبيض .

ووقفت زينب تعد الكراسي ، ولما كانت تعرف تماما عدد الذين سيجلسون حول المائدة قالت في سم عة :

ــ ناقص أربع كراسي .

ووقف حسين مفكرا وقال :

_ وإيه العمل دلوقت ؟

ــ ولا حاجه ، بكره نستلفهم من الجيران .

وقالت لسوسن :

_ عدى ياسوسن الشوك والسكاكين.

وبعد لحظة قالت :

ـــ والا بلاش ، أنا عارفه أنهم مش ح يكفوا ، نستلف شوك وسكاكين الجيران .

فقال حسين متبرما:

. ـــ هو كله من الجيران ؟

ــ يا سيدى الناس لبعضها .

وراح عاطف يعد الأكواب فإذا بكوب يسقط من يده ويتهشم ، فقالت زينب :

_ إيه ده يا مقصوف الرقبه ؟

_ كنت باعد الكوبيّات .

(الحفيد)

مین قال لك تعدهم ، میت مره قلت لك ما تمدش إیدك علی حاجه ، مره تانیه تكسر حاجه ح اكسر رقبتك .

فرماها عاطف بنظرة غاضبة وقال:

ـــ ماتشخوطیش فی کده . انتی عایزه تعقدینی .

اجتمع الجميع حول مائدة الطعام ؛ كان حسين على رأسها وعن يمينه مصطفى علوان ثم زوجته ثم أحلام وجلال ، وعن يساره شفيق فنبيلة فسوسن فزينب ــ لتكون قلب المائدة التي تقوم بتوزيع الطعام ذات اليمين وذات الشمال ــ فسامى وقد جلس قبالته مراد ، وعلى رأس المائدة من الجهة االمقابلة جلس عاطف يتنازعه أكثر من انفعال ، إنه لا يدرى أأجلس في ذلك المكان ليبعد عن الطعام أم تكريما له ؟

وراحت هالة تدور حول المائدة ، إنها حائرة لا تعرف مكانها . كانت الأم تحسب أن كسرة خبز أو دبوسا من حمامة سيلهيها عنهم ؛ ولكن اتضح أن هالة لن ترضى بأقل من أن تجلس على كرسى خاص بها مثلهم . فذهبت إلى حيث كان يجلس أبوها ، فلما رآها حملها ليجلسها فى حجره ، ولكنها أبت وهمت بالبكاء فإذا بمصطفى علوان يتلفت فيرى تكرسيا خاليا فيقوم و يحضره و يضعه بينه وبين حسين ، و يحمل هالة و يجلسها عليه وهو يقول :

ــ دول بركه ، دا ربنا بيرزقنا برزقهم .

ونهضت زينب وتناولت شوكة وسكينا وراحت تحاول أن تقطع

الديك الرومي الذي توسط المائدة ، فراح مصطفى علوان يرقبها وقد تحلب ريقه . إنه لا يستطيع أن يكبح شهوته للطعام حتى تنتهي زينب من التقطيع ، فنهض وقال وهو يمد يديه ليحمل الصحفة والديك :

_ عنك انتى يا ست .

ولما أصبح الديك أمامه راح يمزقه إربا إربا بيديه وهو يستشعر لذة العبث في لحم طرى ، ثم أخذ يوزع على الجميع أنصبتهم . فلما هم بوضع قطعة أمام أحلام أدارت وجهها اشمئزازا وقالت :

ـــ بلاش يا عمى ، أنا مش طايقه آكل لحمه واللا أشم ريحتها .

وتهلل وجه زينب بالفرح .. فطنت إلى أن ابنتها تتوحم ، لقد حملت أحلام دون أن تزف إليها البشرى السعيدة التي كانت تنتظرها ، فرنت إليها في حب وحنان وقالت :

__ أجيب لك حاجه تانيه ؟

فقالت أحلام:

_ حتت جبنه قديمه إذا كان عندك .

ــ عندى يا حبيبتى .

وغادرت زينب المائدة وهى تكاد تطير من الفرح ، وغابت قليلا ثم عادت تحمل قطعة من الجبن وضعتها أمام ابنتها .

ـــ اتفضلي يا حبيبتي .

واستمر مصطفى فى توزيع الأنصبة فوضع أمام زوجته أطيب ما فى الديك ، ووضع لعاطف قطعة صغيرة، فراح عاطف ينظر إليه نظرات

تنطق بعبارات واضحة « هي دي اللي هانت عليك ؟ هو ديك أبوك ؟ » و لم ينس بالطبع نفسه فقد خصها بطبلة الديك ونصفه الأسفل .

ونظرت إليه زينب وقالت في مجاملة :

ــ انت ما خدتش حاجه .. خدت العضم .

فقال مصطفى علوان وهو يدس في فمه أسمن ما في الديك :

__ أصل أنا أحب امصمص العضم .

وقال حسين مداعبا :

_ ما ينوب اللي بيقسم إلا مصمصة صوابعه .

وانهمك الجميع في الأكل وكانت زينب تصوب عينها إلى نبيلة ، فإذا ما التقت الأعين كانت تشير لها برأسها إلى أحلام ؛ كانت تسألها عما إذا كانت قد حملت مثل أختها . وقد فهمت نبيلة ما تقصدة أمها فهزت رأسها نفيا ، فظهر القهر في وجه الأم ولوت شفتها السفلي ووسعت عينها وهزت حاجبها وصعرت حديها ، وفهمت نبيلة أن أمها تقول لها يا حابيه .

والتفتت سوسن إلى نبيلة وقالت لها :

ـــ والنبي يا نبيله وانتي يا أحلام ما تبقوش تغيبوا علينا كده .

فأشرق وجه نبيلة بابتسامة ومالت على سوسن ولولا أن فمها كان

مملوءا بالطعام لقبلتها ، وقالت لها :

ـــ وحشناك يا روحي ؟

فقالت سوسن في بساطة :



ــ لأ . أصل احنا ما بنشوفش الأكل د إلا لما بتيجوا .

وارتبك حسين ، ونظرت زينب إلى سوسن نظرة غيظ ، وظهر الغيظ في وجه أم جلال ، وارتبكت أحلام ، وراحت نبيلة تلكز أختها في جنبها لكزات خفية ، أما مراد فقد ضحك في براءة فإذا بأمه تصوب إليه نظرات نارية فقطع ضحكه فجأة .

وقام عاطف يلملم العظم من على المائدة ، فصاحت أمه فيه قائلة : ___ بتعمل إيه يا ولد ؟

ــ بلم العضم للكلب ، واللا يعني انتو تاكلوا وهو ما ياكلش .

_ سيب ده دلوقت .

وتمطى مصطفى علوان والتفت إلى زينب وقال:

ـــ إيد ما نعدمها .. كان يوم مبروك يوم ما جيتي وعزمتينا .

وطرق قوله رأس حسين طرقا عنيفا فالتفت إلى زينب وكانت ترقبه بطرف عينها ، فلما رأت كل ملامحه تصرخ فيها : بقى كده ؟ انكمشت وراحت تنظر إلى بقايا الطعام التى أمامها . وأحست أن ذلك ليس كافيا ؛ إنها تريد أن تفرّ من المكان فنهضت وراحت تلملم ما على المائدة من صحاف وشوك وسكاكين لتختفى قليلا فى المطبخ حتى يسكن روعها . وأسرع سامى يضع على المائدة صحاف الموز والبرتقال ، فلما عادت وأسرع سامى يضع على المائدة صحاف الموز والبرتقال ، فلما عادت

_ تحلو بالرز بلبن قبله ؟

فقالت أم جلال:

زينب ورأت ذلك قالت:

ـــ كفايه كده .. الخير كتير .

فعادت زينب إلى مكانها ، وكأنما أرادت أم جلال ألا ينتهى الغداء دون أن تنغز زينب ، فقالت :

ـــ سایبه نفسك كده لیه یا ست زینب ؟ مش شایفه إنك زدتی كتیر !

وأحست زينب لسع نقدها يشويها ، إنها كانت تزهو برشاقتها .. وها هي ذي حماة ابنتها التي شد جلدها على عظمها تسخر منها . وضاقت زينب بتلك السخرية ولكنها كتمت غيظها وأمسكت لسانها . وقال مصطفى علوان مداعبا:

ــ ما هو اللي ياكل الأكل ده لازم يسمن .

ورأت زينب الفرصة سانحة لتسخر من حماة ابنتها فقالت :

_ فیه ناس الأكل ما طرح ما يسرى يمرى ، وفیه ناس زى العرسه تاكل وتنسى .

وظهر الغيظ فى وجه الحماة ، ولم تر منفسا له إلا أن تنهض وتغادر السفرة ، فإذا بالجميع ينهضون ويخرجون إلى الصالة وزينب تسأل كلا منهم :

ــ قهوه ولا شاى .

وجلسوا يشربون القهوة ويتسامرون ، ونظر شفيق في ساعته وقال:

ـــ ماتش الكوره .

فنهض حسين وضغط على زرار التلفزيون ، وبعد لحظات ظهرت الصورة كشريط في منتصف الشاشة فقال حسين في فزع :

ـــ إيه ده ؟ مين اللي عمل كده ؟

فقالت سوسن ، جهاز الإذاعة المنزلية :

ــ مراد عمله سکوب .

وقال جلال:

ـــ بسنيطه .. زرار من ورا يعدل الصوره .

ونهض جلال ليصلح التلفزيون وإذا بشفيق يقول له:

_ إيه رأيك يا جلال نروح النادي نتفرج ع الماتش . . أنا و نبيله و انت

وأحلام .

فصاح عاطف:

ً ـــوانا .

وإذا بزينب تقول:

ـــ لا والنبي ، بلاش أحلام ، بلاش تتمخمض اليومين دول .

انقضى الليل وزينب تتقلب فى فراشها لا تغمض لها عين . إن قول حماة ابنتها « سايبه نفسك كده ليه يا ست زينب ؟ مش شايفه إنك زدتى كتير » يلهب عواطفها و يخز روحها و خزا أليما . إنها تستشعر أن جسمها قد امتلاً وأنها فقدت كثيرا من رشاقتها ولكنها ما كانت تظن أنه سيأتى ذلك اليوم الذى ستكون فيه بدانتها موضع سخرية ، وما خطر لها على قلب أن تصبح هدفا لهزء حماة ابنتها .

حاولت أن تغمض عين أفكارها عن ذلك القول إلا أن الصوت الهازئ كان يفح في أعماقها فحيح الأفعى ، وصورة المرأة قد انفرج فمها عن ابتسامة صفراء لم تنثن عن مرقدها . إنها باتت تتعجل النهار لترى رأيها في هذه السمنة وتعمل على إزالتها .

وأحس حسين تقلبها ذات الشمال وذات اليمين فطار النوم من عينيه و لم يشأ أن يحادثها لعلها تنام ؛ ولما وجد أنها مستمرة في قلقها قال لها :

ـــ مالك يا زينب قلقانه ليه الليله دى ؟ بتفكرى فى إيه ؟ وهمت بأن تفضى إليه بحقيقة ما يشغلها ولكنها و جدت أن الأوفق أن تصبر حتى تجد الحل لمشكلتها ، فقالت لتفر من هواجسها :

ــ بفكر فى أحلام .. بتتوحم على تفاح .

بتفكري في أحلام واللا في نفسك .

ودق قلبها فى صدرها خوفا . ترى هل استشف من قلقها شيءًا ؟ وسرعان ما انقشع ذلك الخوف لما قال لها :

ــ خايفه تبقى جده ؟

-- جده ؟! هو عشان ما اتجوزت صغیره ، حلوه دی .. أنا طول عمری ح ابقی ماما زوزو وانت بابا حسین .

وراح يداعبها وهو يقول :

ــ أنا جدو حسين .

وأشرقت الشمس وأسرعت سوسن إلى الحمام وأغلقته خلفها . وجاء سامى وعلى كتفه الفوطة وراح يفتح باب الحمام ، فلما علم أن سوسن بداخله قال متأففا :

ــ هو احنا خلصنا من نبيلة طلعتي انت لنا ؟

وكانت زينب في طريقها إلى المطبخ ، فلما سمعت قوله قالت :

ـــ والله هي اللي ا ستريحت من وشك .

فقال سامي في استسلام:

ـــ يا فتاح يا عليم .

وسمع طرق الحذاء على الباب فصاحت زينب :

ـــ مراد ، افتح لاخوك الباب .

وقام مراد يتمطى ، فانلته قد حرجت من تحت بنطلون البيجاما وتدلت من الجاكتة ، وذهب إلى الباب وهو بين النائم واليقظان وفتحه فإذا بعاطف يدخل مهرولا ويقول :

_ جبت بيضتين من عند الفراخ.

فخرجت زينب من المطبخ وقالت في إنكار:

_ بس ؟

فقال عاطف يفسر لها السر:

ـــ ولقيت في العشه قشر كتير .

ونادت زينب في غضب:

ــــامراد .. سواسن .

وخرجت سوسن من الحمام وذهبت إلى حيث كانت أمها فى الصالة ، وجاء مراد وهو يسبل عينيه كأنما يخشى أن يستيقظ ، وقالت لهما الأم :

_ مين فيكو اللي طلع شرب البيض ورمي القشر ؟

فقال مراد في بساطة:

_ أنا .

ـــ تبقى حرامى .

 فقالت زينب لتنهي الموضوع :

_ أنا ح اجيب قفل للعشه .

ووضعت صينية على مائدة الصالة عليها علب الجبن والزيتون والحلاوة الطحينية ، ووضع إلى جوارها خبز فجاء الأولاد يأكلون . راح سامى يتناول إفطاره فى عجلة وهو واقف وفى يده كتاب يقرأ فيه فقالت له الأم :

_ ما تقعد تاكل يا سامى ، واللا عايز الأكل ينزل فى رجليك ؟ فابتسم سامى ابتسامة حفيفة ساخرة ، ثم انصرف فقالت له الأم : __ باقول لك امشى .

وجاء عاطف وفی یده بیضة سلقها وراح یقشرها ، فلما انتهی منها خطفتها سوسن و دستها فی فمها فراح عاطف یصرخ و یبکی ، فجاء أبوه وقد ارتدی ملابسه وقال له :

... بس بلاش عياط .

فاستمر عاطف يبكي ويشير إلى فم سوسن :

_ البيضه .. البيضه ..

ـــ طب اسكت وخد قرش .

فكف عاطف عن البكاء ومد يده وقال:

__ هات ،

وأخذ عاطف القرش واندفع خارجا ، وانصرف الجميع و لم يبق في الدار غير زينب فذهبت إلى الشرفة ووقفت ترقب شرفة جارتها ، فلما

لمحتها حيتها ثم دار بينهما حوار ، قالت زينب :

ــ مش عارفه اعمل إيه ؟ ما باكلش وعماله اتخن .

ــ خسسي روحك .

_ یا ریت! بس ازای ؟

_ ـــ فيه صابون بيخسس ..

ـــ هو فين ده ؟

__ في بلاد بره ولسه ما جاش .

۔۔ یعنی ح استنی لما بیجی .

و لم تنتظر . انسلت من الشرفة وانطلقت إلى شارع الشواربي . وعادت إلى البيت وراحت تخلع ملابس الخروج ، وإذا بجرس الباب يدق دقا مستمرا . إن إصبعا ضغطت على الزر و لم ترتفع عنه فصاحت في ضيق :

ــ طيب يا سوسن جايه .. جايه أهه .

وفتح الباب ودخلت سوسن فقالت لها أمها تنهرها :

ــ ميت مره قلت لك ما تحطيش إيدك ع الجرس على طول .

وعادت زينب تستأنف خلع ملابسها وإذا بالجرس يرن في رفق .

فقالت زينب:

ـــ سوسن افتحى الباب ، بابا جه .

ودخل حسين فوجد زوجته تنلع ملابس الحروج فنظر فى دهشة وقال :

- _ إنتي خرجتي ؟
- ـــ خرجت ادور على حبوب التخسيس .
 - ــ حبوب التخسيس ؟!

فقالت في عتاب:

_ إنت ما سمعتش أم جلال قالت لى إيه ؟ عصاعيص النقريــه بتتمسخر على .. أنا .. أنا لازم اخس يا حسين .

__ يا زينب اعقلي .

... أنا اتفقت مع الراجل خلاص ، قلت له يحضر لى الحبوب عبال ما الجيب له الفلوس .

فقال في سخرية:

.... و كام الفلوس *دى* ؟

ـــ الكورس بعشره جنيه .

فقال وهو يخلع كرافتته في غيظ :

ـــ وح تخدی کام کورس ؟

ــ سته بس يا حسين .

_ یعنی ح ادفع ستین جنیه عشان تخسی ، ویا تخسی یا متخسیش ! فقالت فی صوت فیه نحیب :

- يعنى مستخسر في ستين جنيه بعد العشره الطويله دي كلها ؟

_ لأ مش مستخسرهم .. بس أجيبهم منين ؟

ــ استبدل لي جنيه من المعاش . اشمعني استبدلت لأحلام .

وارتفع صوت حسين ، قال في انفعال :

_ أستبدل لك جنيه ؟ لما جوزت أحلام قلت فى الطلب إنى ح اجوز بنتى ، أقول إيه فى الطلب بتاعك ؟ أقول عايز استبدل جنيه عشان أخسس مراتى ؟!

ووصل صوت الأب إلى مسامع سوسن فجاءت ووقفت تسترق السمع ، سمعت أباها يقول :

ــ ده كلام فاضى . . دى قله عقل .

فقالت زينب وهني تبكي :

ــ ده جزائی .. دی آخر عشرتی معاك .

وتركت الغرفة غاضبة وقد تركت دموعها تسيل على خديها دون أن تحاول أن تكفكفها ، واندفعت كالعاصفة إلى غرفة البنات وأغلقت الباب خلفها في عنف .

ودخلت سوسن على أبيها وقالت له :

_ إنت طلقتها خلاص ؟

فارتسمت ابتسامة كبيرة على وجه حسين .

جلست زينب ترفو جوارب أبنائها وتحاول أن تتبع الرواية التي كانت تجرى أحداثها على شاشة التلفزيون ؛ وجلست سوسن تتابع الفيلم باهتمام ، وراح عاطف يقول في ضيق :

__ ما تخلصونا بقى ح تفلقونا على إيه ؟ ما احنا عارفين فى الآخر تتجوزوا .

وقفت الأم عن رفو الجورب الذي في يدها وقالت :

ــ وطى حسك ، سامى ومراد بيذاكروا .

فقال تحاطف في صوت خافت :

ـــ ماما . هي كل الروايات لازم يتجوزوا في آخرها ؟

_ مش كلها يا عاطف .

وجاء الأب يشارك أبناءه جلستهم ، فلما رأى سوسن أمام التلفزيون قال لها :

_ إنتي مش ح تداكري يا سوسن ؟

فقالت دون أن تلتفت إليه :

ـــ لما تخلص الرواية يا بابا .

(الحفيد)



ورن جرس الباب فقامت الأم وفتحته ، فألفت فتاة جميلة ترتدى بنطلونا طويلا وفوقه جاكت تدلت إلى ما تحت الركبة فنظرت إليها فى إنكار ، فقالت الفتاة فى ثبات :

ــ سامي موجود يا تانت ؟

فقالت الأم في عصبية:

ـــ مش موجود .

فنظرت الفتاة إليها في شيء من الدهشة وقالت لها :

ـــ لما ييجي قولي له جيهان سألت عليك .

ودارت الفتاة على عقبيها وانصرفت وزينب تنظر إليها غير مصدقة ،

فلما هبطت الدرج أغلقت زينب الباب خلفها في نرفزة و دخلت تقول:

ــ بنات آخر زمن . جياله لغاية هنا برجليها .

وراحت تقلدها في مبالغة وهي تتاوج:

ـــ سامی موجود یا تانت ؟ قال تانت قال ، إحنا ما کناش بنات ! ونهضت سوسن فقد سنحت لها فرصة نقل خبر ، وانطلقت إلى حیث کان سامی و قالت له :

ـــ واحده جت سألت عليك ، ماما قالت لها مش موجود .

وألقى سامى الكتاب الذى كان فى يده فى غضب وحرج إلى حيث كانت أمه ، وسوسن خلفه مبتهجة تقفز من الفرح قفزا ، ترقب فى سرور ما ستسفر عنه المشادة المرتقبة ، وقف سامى أمام أمه وقال :

_ حد سأل على ؟ .

فقالت أمه دون أن ترفع عينيها عن الجورب الذي كانت ترفوه :

- _ سامى ، أنا مش عايزه المسخره دى تحصل تانى .
 - ـــ مسخرة إيه ؟
- __ إزاى مقصوفة الرقبة دى تيجى لغاية هنا تسأل عليك ؟ ولاحظ الأب أن سامى سينفجر في أمه فقال ليخمد النار المتأججة في صدر ابنه:
 - ـــ واحده اسمها جيهان سألت عليك .
 - ــ وما ندهتوليش ليه ؟
 - فقالت الأم في انفعال شديد:

__ هو اللي كان ناقص .

__ إيه هو اللي كان ناقص ؟ دى زميلتى فى الفصل زى ما نبيله لها زملاء رجاله فى الفصل .

فهبت الأم ثائرة كأنما جرح كبرياءها وقالت:

_ ما تقولش كده .. أنا بنتي مؤدبه ؟

_ ومن قال إن جيهان مش مؤدبه ؟

ب لو ماكانتشى بجحه ما كانت جت برجليها لغاية هنا .

_ فيها إيه لما جت لغاية هنا ؟ هو ده مش بيت محترم ؟

وأحست زينب أنها ستهزم إذا ما استمر الحوار فالتفتت إلى زوجها

_ ما تشوف ابنك يا حسين !

فالتفت حسين إلى سامي وقال:

ـــ روح ذاكر يا سامي ، حصل خير .

فقال سامي وهو ينصرف :

_ تكدبوا وتقولوا إن انا مش هنا وبعدين تقولوا حصل حير ! وغاب سامي في غرفته فقالت زينب لزوجها :

__والله ما ح يخسرهم إلا تطريتك دى ، يا راجل خليك حمش مره .

وكأنما لم يعجبه كلامها فانسحب إلى غرفة النوم ، فقامت زينب

خلفه وراحت تقول:

ــ أنا عايزه أعرف اللي بينه وبينها ؟

فقال حسين في هدوء :

__ ح یکون بینه وبینها اِیه ؟ زمیلته فی الجامعه وبینه وبینها صداقة بریئة .

فقالت في غيظ وقد أخذت ثوبها عند صدرها بين أصابعها وراحت تهزه:

__ بريه . بريه ! قال صداقه بريئه قال . . هو فيه في الدنيا دى صداقه بريئه ؟!

_ عيبك إنك دايما تسيعي الظن بالناس.

_لأ ... نحط الكبريت جنب البنزين ونقول صداقه بريئه ، يا راجل فوق بقى ، اسألنى أنا دا كله تحت باطى .. ح ييجى واد مفعوص زى ده ع الآخر وياكل بعقلى حلاوه .

__ اسمعى نصيحتى يا زينب ، إن جت سألت عليه مره تانيه قولى لها اتفضلي .

فقالت ساخرة:

ـــ وادخلها على فين ؟ على أودة النوم ؟!

وأعرض عن قولها واستمر في حديثه قائلا :

_ مش أحسن لما يتقابلوا قدامنا من إنهم يتقابلوا من ورانا ؟

_ وایش عرّفك انهم مش ح یتقابلوا من قدامنا ومن ورانا .

_ بلاش كلام فارغ ، إذا عرفوا إننا ينثق فيهم مشح يكدبوا علينا .

فقالت في تهكم:

ــــ اسم الله يا بنثق . فوق يا خويا فوق دا جيل يعلم به ربنا .

وخرجت إلى حيث كانت سوسن وعاطف وكانا يتابعان الفيلم .

فلما رأت سوسن أمها اتجهت إليها وقالت :

_ ماما . . إزاى واحده ست تحبل من غير ما تتجوز ؟

فقالت زينب في فزع:

ــ اخرسي يا قليلة الأدب .

وأرادت سوسن أن تنفى عن نفسها ما أغضب أمها فقالت :

ـــ أنا مالي ، التلفزيون اللي بيقول كده .

ونظر عاطف إلى سوسن وقال لها:

_ سيبك من ماما ، تعالى أنا أفهمك .

فهبت زينب ثائرة واندفعت إلى حيث كان حسين وراحت تولول :

_ یا خرابی .. یا خرابی .. جیل آخر زمن .

وضعت زينب الهدايا التي ستحملها إلى ابنتها نبيلة في كيس من البلاستيك . لقد زعمت أن ابنتها أوحشتها كثيرا وأقنعت زوجها أن يشترى شيكولاتة وأشياء أخرى فما يليق أن تدخل إلى ابنتها خاوية اليدين . صدق الرجل أن ذهاب زينب إلى ابنتها إن هي إلا زيارة بربئة وما خطر له على قلب ما كان يدور في رأس الأم .. إنه كان يحب أن يذهب معها إلا أنه كان مضطرا إلى العودة إلى عمله بعد الظهر فنهاية السنة المالية على الأبواب ، وكان عليه أن يقفل حسابات السنة التي تجرى بخطوات واسعة لتصبح في ذمة التاريخ!

كان يتعجل خروج زينب ليخرج ، ولكن زينب من عادتها أن تتلكأ كثيرا قبل أن تغادر البيت . إنها تعيد ترتيب كل شيء ، تلتقط قصاصات الورق من الأرض ، وتبسط الستائر التي تكون قد جمعت ليدخل النور ، وكانت دائما تعود إلى غرفة النوم بعد أن تصل إلى باب الخروج لتلتقط شيئا نسيته أو تتأكد من أنها أحكمت إغلاق بابها .

وفى أثناء هزها للستائر قال لها حسين :

ــ ح تروحي لوحدك ؟

فقال عاطف:

ـــ أنا ح اروح معاها .

فقال الأب:

_ مش کنت خدت حد کبیر ؟

فراح عاطف يفرد طوله ويشب على قدميه وقال:

_ طب ما انا كبير اهو .. أنا بقيت راجل .

وابتسم حسين وقالت زينب لعاطف :

_ ياللا يا راجل .

وفتحت زينب الباب لتخرج ، فقال حسين ساخرا :

_ ما نستیش حاجه ؟

فدارت زينب على عقبيها وقالت:

_ فكرتني . الجونتي .

وعادت تفتح باب غرفة النوم التي أغلقتها بالمفتاح ، واتجهت لتحضر القفاز وحسين في الصالة ينفخ ضيقا وعاطف يتململ في وقفته ، وعادت تحمل الكيس في يد والقفاز في اليد الأخرى وذهبت لتخرج ، ولكنها قبل أن تغادر الباب ثبتت طرف حذائها على الأرض ورفعت كعبه والتفتت تنظر إلى ساقها ثم قالت لزوجها :

_ والنبي يا حسين شوف الشراب معدول .

ـــ معدول يا ستى .

ولما اطمأنت إلى حسن هندامها تحركت ، فقال لها حسين :

_ خدو تاكسى .

فقالت في براءة:

__ والأتوبيس ماله .. ليه البعزقه اللي ما لهاش لازمه ؟ ما كل الناس بتركب الأتوبيس .

وخرجت زينب وعاطف إلى جوارها مزهوا بنفسه ، وراح حسين يتبعهما بنظره ، وقد كست وجهه موجة إشفاق وسخرية ، إشفاق على نفسه وسخرية من زوجته العاقلة المدبرة !

واندست زينب فى الأتوبيس وانحشرت بين الواقفين وأوقفت عاطف أمامها ، إنه يتنفس بصعوبة من الزحام الذى يضغطه ضغطا . . وأحست زينب بشاب يتحرك خلفها فالتفتت إليه فلم ترتح إلى هيئته ، فراحت تنقل عاطف من أمامها إلى خلفها و لم يكن ذلك أمرا ميسورا . وأصبح أمامها رجل يرتدى ملابس رياضية وقد أمسك العمود الذى تعلق به الواقفون بيد يزين معصمها ساعة ذهبية .

ورأت يدالشاب الذي كان خلفها تتحرك في خفة وفي حركة خاطفة تخلع الساعة من الرجل الواقف أمامها فصاحت صيحة لا إرادية :

ــ الساعه ..

فالتفت الرجل الذي سرقت منه الساعة في سرعة وقبض على يد النشال وفي يده الساعة الذهبية ، وقال له في وعيد :

ــآه يا حرامي !

وراح النشال يستعطف الرجل:

- ـــ خلاص يا بيه .. ساعتك معاك .. أنا غلبان وعندي عيال .
 - _ أنا عارف ألاعيبكم ، عارف كل طرق النشل بتاعتكم .
- ۔۔ خلاص یا بیہ . . ح تاخد إیه من حبسی ؟ . ح تجوع عیالی . . سیبنی اللہ یسترك .

فقال الرجل هازئا به:

- _ مش ح اسيبك إلا لما توريني نشلتها ازاي من أيدي .
 - ـــ أمرك يا بيه .. ارفع إيدك زى ما كنت رافعها .

ورفع الرجل يده وأمسك بقبضته العمود الأفقى الذى يتعلق به الواقفون ، وفى خفة خاطفة نشل النشال الساعة وقال وهو يقفز من الأتوبيس :

ـــ نشلتها كدا هوه .

وأطلق النشال ساقيه الريح وانفجر ركاب الأتوبيس يضحكون ، والرجل الناصح غارق في الخجل .

ودخلت زينب وعاطف على نبيلة ، فوضعت زينب الكسيس البلاستيك الذى ملىء بالهدايا على أول منضدة قابلتها ، وراحت تقبل ابنتها التى قادتها إلى غرفة الاستقبال وزينب تقول :

_ نقعد هنا يا نبيلة ، هو احنا غرب ؟

وجلستا تتحدثان ، وفيما هما تتحاوران قالت الأم :

ــ ما جبتيشي لنا حاجه حلوه كده زي أحلام ؟

فقالت نبيلة في بساطة:

- _ لاً .. أنا متفقه مع شفيق إننا ما نخلفش إلا لما اخلص الجامعه .
 - ـــ وليه بقى يا بنتى ؟ ما فى الجامعه ستات كتير مخلفه .
 - بیقول لی تروحی الجامعه إزای وبطنك علو كده .
 - وتشير بيدها إشارة فيها مبالغة :
 - ـــ ما ستات كتير بتروح الجامعه وبطنها علو كده .
 - فقالت نبيلة في إنكار:
 - ـــ أروح الجامعه كده ازاى ؟
- ـــ يا بنتى البكريه بطنها ما بتبنشى ، وفى الشهور الأحيره البسى . هدوم واسعه .
- ــ. دا شفيق يقول لى تعملى إيه لو ولدتى فى الامتحان واللا قبل الامتحان بجمعه ؟
- ـــ یا حتی دی تلاکیك ، بعنی كان منشن علی الامتحان ؟ دا بس هو مش عایز یر تبط بحاجه ، عایز یفضل حر . إن ما ربطهش بعیل مین عارف یمكن یطیر .
 - _ يا ماما شفيق مش من دول .
- كلهم يا بنتى من دول . . اسأليني أنا ، أمال أنا خلفت سبعه ليه ؟
- ــ سبعه يا ماما ؟ الأيام دى راحت خلاص .. مين في اليومين دول
 - بقدر على سبعه ؟ يجيب لهم صحه منين ؟ يجيب لهم فلوس منين ؟
- ـــالصحه ربنا بيديها على قد ما بيدى العيال . . واغلبيه بالعيال يغلبك المال .

- ــ كفايه يا ماما واحد واللا اتنين .
- ــ دا الكلام الفارغ اللي بيعلموه لكم اليومين دول .
 - ... مش كلام فارغ يا ماما . كفايه واحد .
- ـــ بس هاتى الأولانى وانت نفسك ح تتفتح لهم ، ح تدوق لذتهم . وراح عاطف يأكل الشيكولاتة التى قدمتها له أخته ، إنه لم يكتف بقطعة أو قطعتين ، لقد ذاق لذتها فانفتحت لها نفسه .
 - ونهضت الأم لتنصرف فقالت لها نبيلة :
 - _ ما بدرى يا ماما .
 - _ نروح قبل الدنيا ما تصلم علينا.
 - ــ استنى شويه زمان شفيق جاى يوصلكم .
 - تفتح حقبية يدها وتبحث فيها ثم تقول:
 - _ نسيت المشط .

فتلتفت نبيلة إلى عاطف و تقول له:

ــ هات يا عاطف المشط من أودة النوم .

يد حل عاطف غرفة النوم ويتجه إلى التواليت فلا يجد المشط ، يفتح الدرج فيجد مشطا ويجد في الدرج مانع للحمل ، يتناول المشط ويدسه في جيبه ، ثم يأخذ مانع الحمل وينفخه ويخرج إلى حيث كانت أمه ونبيلة وقد امتلاً العازل بالهواء وأصبح في حجم الباذنجانة السوداء الطويلة . ورأت نبيلة ما يفعله أخوها فهرولت إليه وخطفت منه العازل في شدة ورأت الأم ما فعلته نبيلة دون أن تفطن إلى الدافع لها على ذلك فقالت في

عتاب:

_ مالك خضيتي الولد كده على حتت زمارة ؟

وفتح الباب ودخل شفيق ، فتنفست نبيلة الصعداء وقالت :

__ أهو شفيق جه .. اقعدى معاه شويه يا ماما .

ــ معلهش يا بنتي مره تانيه .. اتأخرنا .

_ طب شفيق يوصلكم .

فقال شفيق في رقة :

__ اتفضلوا ..

وركبت زينب في المقعد الخلفي للسيارة وجلس عاطف إلى جوار شفيق وانطلقت السيارة ، فاذا بعاطف يلحظ أن في مؤخرة السيارة التي أمامهم لوحة كتب فيها (E.T.) فقال لشفيق وهو يشير إلى اللوحة .

ـــ يعنى إيه (. E . T) يا أنكل ؟

ــ يعنى اوعى تتشعبط .

وضحكت زينب ونظر إليه عاطف عاتبا ، فلما وصلوا هبطت زينب وهي تقول :

_ اطلع يا شفيق ما يصحش عمك فوق .

فقال شفيق معتذرا:

_ مره تانيه يا تانت .. عندى شغل كتير الليله دى .

وعاد ليجد نبيلة في الفراش تنتظره ، فراح يخلع ملابسه ثم اتجه يحضر مانع الحمل ، فلم يجده فلما سألها عليه قالت له وهي تضحك :

_ اسكت مش عاطف عتر فيه وافتكره زماره .

فالتفت إليها وقال:

_ طب خدتی الحبایه ؟

فقالت في تخاذل:

__ خدتها .

وأحس في لهجتها عدم الصدق ، فأعاد النظر إلى ورقة الحبوب وراح يعدها ثم قال :

_ أنا شايف إن عدد الحبوب ما نقصى .

فمدت له ذراعين بضتين عاريتين وقالت في إغراء :

ـــ تعال ...

فهرع إليها يرتمي في أحضانها .



كانت زينب تغدو وتروح فى قلق ، وكان حسين يذهب إلى الشرفة وينظر وتطول مراقبته للطريق ثم يعود ليدور فى حجرات المنزل . ونظرت زينب إلى الساعة المعلقة فى الصالة فإذا بها تستشعر أن دقات قلبها تعلو على صوت البندول . و لم تستطع أن تستقر فانطلقت إلى حيث كان زوجها وقالت له :

ـــ الساعه بقت تسعه يا حسين ومراد مجاشي من المدرسه .

فخرج سامي من غرفته وقال :

ــــ دلوقتی بیجی ح یروح فین ؟

فقالت زينب في صوت مخنوق :

ــ دا ما تغداشي يا عيني .

فقال حسين ليطمئن نفسه:

ــ تلاقيه اتغدى مع حد من صحابه .

ـــدا ما تعودش يتأخر لغاية الساعه دى .. لو كان راح يلعب كوره كان زمانه حه . ما فيش الا إنه ركب بسكلته وهفه أتومبيل .

وفزع حسين وقال لها :

_ یا شیخه افتکری حاجه عدله ، هو انتی ما تفکریشی فی خیر أبدا ؟

فقالت زينب مولولة:

_ ح ييجي الخير منين والواد بره لغاية دلوقت .

وأراد حسين أن يفر من تشاؤمها فذهب إلى الشرفة وراح يطل على الطريق وهو قلق ، وطالت وقفته فقلقه أهون من ذلك الوحز الذى بخز روحه كلما تحرك لسان زوجه بالشر .

وراحت الهواجس تعبث به فرأى أن يفر منها إلى زوجته . فدخل فإذا به يسمع زينب تقول لسامى :

فقال سامي في ضجر:

ـــ أدور عليه فين ؟ في مصر كلها !

فقالت زينب في توسل :

ـــ شوفه عند حد من صحابه يا حبيبي .

فقال سامي وهو يولي أمه ظهره :

_ هو دا له صاحب واللا اتنين ؟ دى المدرسه كلها صحابه .

وإذا بعاطف يأتى ويتوسط الصالة وهو يقول :

ـــ والمدرسين كان ، دا قال ..

و لم تدعه أمه يتم حديثه بل دفعته وهي تقول :

ـــ والنبي تغور من وشي دلوقت 🕝

ورأت حسين مقبلا من الشرفة فهرعت إليه وقالت :

ـــ روح يا حسين شوفه مرمى فى القصر العينى والــلا فى أى مستشفى .

وظهر فى وجه حسين الذعر وخفق قلبه فى فزع وقال فى ضيق : __ ما تفتكرى خير .

فقالت وقد اختنق صوتها بدموع تود أن تنسكب على حدها:

ـــ أمال يعنى ح يكون فين لغاية دلوقت .

و دخلت سوسن إلى الشرفة ثم عادت تقفز فرحا:

ـــ مراد جه .. مراد جه ..

وارتمى الأب على مقعد قريب واستنشق نفسا طويلا ثم زفره فى راحة ، وإذا بزينب تقترب منه وتقول له ;

ـــ لما يطلع اشخط فيه ، خوفه مره ، بلاش التطريه دى .

فقال حسين وقد تبخر قلقه ورد إليه طبعه الهادئ :

ـــ مش لما نشوف كان فين ؟

و فتحت سوسن باب الشقة وأسرع عاطف ليستقبل أخاه في منتصف السلم ، فلما قابله قال له متوعدا :

_ دى ماما ناويالك نيه .

وصعد مراد صامتا ، فلما وصل أمام الشقة استقبلته سوسن وقالت له وقد وضعت يديها في وسطها وهزت نصفها العلوى يمينا وشمالا : ___ كنت فين يا اخويا لغاية دلوقت ، دى ليلتك مش فايته .

(الحفيد)

وأطلت زينب من الباب ومدت يدها وقبضت عليه وجذبته حتى أمسي في منتصف الصالة وقالت له :

ـــ داير على حل شعرك ، مالكش أهل تقول لهم رايح فين ؟ الساعه بقت عشره ؟ بقينا نص الليل وانت في الشارع من طلعة النهار .

وأطرق مراد ولم ينبس بكلمة وإن كانت أمه تلكزه في صدره لتنفس عن الغيظ الذي كاد ينثرها أشلاء ، ونهض حسين وقال لابنه في رقة : __ كنت فين لغاية دلوقت يا مراد ؟

فقال مراد وهو يستشعر أسي لأنه سبب لأهله كل ذلك القلق:

__ واحد صاحبی معاه عربیه قال لی تعال معایا نروح القناطر نجیب حاجه من بیتنا ، قلت له أنا ما قلتش انی ح اتأخر ، قال لی مش ح نتأخر ، ورحت معاه ، واحنا راجعین انقطع سیر العربیه ما قدرناش نرجع إلا لما اشترینا سیر تالی .

فقالت له أمه:

ــــ لما انقطع السير ما سبتوشي ورجعت ليه ؟

_ ما كانش معايا فلوس ، وإن كان معايا فلوس ما كنتش ح اسيبه ، احنا خرجنا سوا لازم نرجع سوا .

فلكزته أمه في صدره وقالت:

ـــ شهم قوى .

وأراد حسين أن يضع حدا لهذه المشادة فقال:

_ طالع لامه .

ونظرت إليهم نظرة فيها سخرية وقالت :

ــــ والله انتوا بتلعبوا .

وقال سامي في ضجر:

_ عايزين نتعشى عشان نذاكر .

فقالت زينب وهي ترمي مراد بنظرة غاضبة:

ـــ البركة في اخوك اللي سد نفسنا .

وذهبت تعد لهم العشاء ودخل مراد يبدل ثيابه ، وتذكر حقيقة ما كان .. إنه كان مع زميل من زملاء المدرسة حقا وركب معه سيارته حقا وانطلقا إلى القناطر حقا . كان صادقا في كل ذلك ، أما الشيء الذي أخفاه فهو أن إلى جوار صديقه كانت فتاة ، وإلى جواره في المقعد الخلفي فتاة أخرى ، وقد قطع شيء حقا و لم يكن ذلك الشيء سير المروحة بل ممالة قميص الفتاة التي كانت تجلس في المقعد الأمامي إلى جوار صديقه ! حمالة قميص الفتاة التي كانت تجلس في المقعد الأمامي إلى جوار صديقه ! ودق جرس الباب فذهب حسين وفتحه ، فإذا بجيهان أمامه تسأله :

· ـــ سامي موجود يا أنكل ؟

فقال حسين وهو يفسح لها طريقا :

ـــ أيوه يا بنتي اتفضلي .

ودخلت جيهان في خطوات ثابتة ، وراح عاطف وسوسن ينظران إليها في فضول وسرعان ما جرت سوسن إلى حيث كان سامى ، وقالت جيهان :



_ أنا ما رحتش الكليه النهارده ، جيت آخد نوت محاضرات سامي عشان انقل المحاضرات اللي فاتتنى .

فقال لها حسين في هدوء :

ــ اتفضلي يا بنتي ، سامي جوه .

ووقفت جيهان مترددة فقال حسين لعاطف:

ــ وصلها يا عاطف .

ووصلت الأصوات إلى مسامع زينب فخرجت تنظر فإذا بها تجد سامى وجيهان يتقابلان عند باب حجرته ، فارتسمت على وجهها دهشة وزادت دهشتها لما رأتهما يدخلان الغرفة ، ونظرت إلى زوجها في إنكار فإذا به يرد عليها بكل ملامحه وحركات يده ليقول لها : وفيها إيه ؟!

ووقع بصرها على عاطف فراحت تشير له أن يدخل معهما ، فسوسن قد عادت لتجلس أمام التلفزيون . وأطاع عاطف أمه فدخل ، وشمت زينب رائحة شيء يحترق فهرعت إلى المطبخ وأنزلت البيض الذي صار في لون الفحم ، ثم عادت لتتابع ذلك العبث الذي يجرى تحت بصرها وسمعها .

وحرجت جیهان وإلى جوارها سامى وخلفهما عاطف ، كانت جیهان تحمل نوت المحاضرات التى اقترضتها ، ومدت یدها تصافح سامى و تقول له :

_ متشكره .

وسارت حتى إذا ما وصلت إلى حيث كان حسين قالت له :

_ مساء الخير يا عمى .

فقال لها حسين في صدق:

_ ما بدری یا بنتی ، استریحی م السلم .

ـــ مره تانيه يا عمى ، بابا مستنى تحت .

فقال حسين:

_ ما يصحش ، انزل يا سامي وقول له يتفضل .

وتحرك سامي فإذا بجيهان تمنعه وتقول :

_ ما تتعبش نفسك ، مش ح يطلع .

ـــ ليه يا بنتي ؟

_ أصل بابا بينكسف .

ولمحت جيهان زينب وقالت لها :

_ مساء الخيريا تانت .

ووسعت جيهان خطوها وانصرفت لا تلوى على شيء ، وارتمت زينب متهالكة على مقعد قريب وقالت :

_ لو كان بينكسف ما كانشي جاب أم وش عريان دى .

جلست أحلام تستشعر غبطة فى أعماقها . كانت سعيدة لأنها على وشك أن تحقق رسالة كل أنثى فى الحياة ، وكان جلال مزهوا برجولته رافعا رأسه لكأنما كان أول رجل أنجب ، وكانت زينب متهللة بالفرح فلو أنها قد جاءت بسبعة أبناء إلا أن سرورها بأن ابنتها ستصبح أما كان يفوق كل سرور ملأها .

ورنت زينب إلى ابنتها في حب وقالت :

ـــ إزيك دلوقت يا أحلام ؟

فقالت أحلام:

ـــ لسه راجعین من عند الدکتور ، قال لی عندك شویة زلال . وبسطت أحلام ساقها لتری أمها أن بها بعض الورم .

فقالت الأم وهي تشوح بيدها مستنكرة :

ـــ دكتور ؟ دكتور إيه ، أنا خلفتكم كلكم ما رحتش ولا مره لدكتور .

فقال جلال:

ـــ وقال لها لازم تمشى كل يوم .

_ تمشى يا خويا ما تمشيش ليه ؟ دانا رجعت م الغوريه وبعدها بنص ساعة ولدت أحلام .

فقال جلال مداعبا:

ـــ وكنتي بتعملي إيه في الغوريه يا تانت ؟

فقالت زينب وقد أشرق وجهها للذكريات :

_ كنت باشترى مغات .. هو يرم عضم الوالده إلا المغات ! وكأنما كرهت أحلام ألا تكون محور الحديث فقالت وهي تنظر إلى جلال في حب :

_ جلال يا ماما اتفق مع الدكتور على كل حاجه ، قال لى الدكتور



أول ما تحسى بوجع تيجي ع المستشفى على طول .

فقالت زينب في فزع:

ـــ مستشفی ؟ مستشفی إیه یا بنی ، ده احنا عمرنا ما دخلنــا مستشفی ، طول عمرنا بنولد فی البیت .

فقال جلال في هدوء:

ــ الدنيا اتنورت يا تانت .

ولم يعجب ذلك زينب فقالت :

ــ اتنورت إيه يا جلال ؟ ده محن ستات .

وارتفع صوت التليفزيون حتى كاد يغطى على حديث الولادة ، فصاحت زينب في غضب :

ـــ بت یا سوسن ! ح توطی صوت التلیفزیون ده واللا ح اقوم اطفیهولك ؟

وأسرعت سوسن وخفضت الصوت ، فعاد جلال يقول :

ــ في المستشفى يا تانت استعدادات .

ـــ استعدادات ليه ؟ يا بنى الولاده فيها حاجه ؟ أنا لما ولدت عاطف قمت بعدها على طول وغسلت كوم غسيل قد كده وطبخت العشا ، واللا كنت ح اسيبهم من غير عشا ؟

_ ما كانش البكرى يا تانت .

فالتفتت إلى ابنتها وقالت :

ـــ والله ما ولدت ولاده أسهل من ولادة أحلام ؛ الفلوس اللي ح

نحطها في المستشفى نعمل بيهم سبوع نفرح ونفرّح الجيران.

ـــ ما تولد في المستشفى ونعمل السبوع برضه .

و لم يعجب زينب رأيه فقالت :

__ أنا واحده صاحبتي ولدت في المستشفى ، أول ما شافت ابنها عضته في كفه ، والعجيبه إن تاني يوم جابوه لها هو بعينه .

فقال جلال معقبا على زوجه:

ــ وإيه العجيبه في كده ؟

فقالت أحلام لتجد مبررا للولادة في بيت أمها:

ــ بيقولوا الأولاد بتتبدل في بعض .

وأسرعت زينب تشد أزر ابنتها قالت :

_ أنا ما طقشى ضنايا يبعد عن عيني ثانيه .

ودخل عاطف ورأى أمه قدمت بعض الحلوى لأخته وزوجها فمد

يده ليتناول منها ، فإذا بأمه تقول له :

_ عيب يا عاطف .

فقال جلال وهو يقدم قطعة حلوي إلى عاطف :

_ سبيه يا تانت .

فقالت زينب وهي ترمي ابنها بنظرة شزراء :

_ بعدين ياحد على كده .

ــ ما فيش حد غريب .

ـــ ما الخوف ليعمل كده قدام الغرب .

وقالت لعاطف :

_. امشى العب تحت .

فقال عاطف:

ـــ طب هاتی قرش .

وأخذ القرش ومر إلى جوار سوسن وهي تتبع الإعلانات في التلفزيون فرماها بنظرة هازئة ، ثم اتجه إلى الباب وما إن فتحه حتى ارتطم بأبيه فقال له أبوه :

_ بتجری کده علی فین ؟

فقال في فرح من قام بمعجزة:

ـــ رایح اضیع ، حدت منها قرش .

ودخل أبوه فلما لمح أحلام وجلال صاح مرحبا :

__ أهلا جلال ، أهلا أحلام .

وجلس وظهر على جلال الارتياح ورأى أن يشركه فى الحديث ، كان واثقا من أن حماه سيقف إلى جواره ولن يخذله قال :

... كنا بنتكلم فى موضوع ولادة أحلام ، أنا رأيى انها تولد فى المستشفى ورأى تانت إنها تولد هنا .

فقال حسين في بساطة :

ــ أنا ماليش رأى ، الرأى لأحلام .

وكاً نما وجدت أحلام أنها تستطيع أن تفصح عن رغبتها دون أن يثور · زوجها ما دامت في حمي والديها فقالت : _ أنا عمري ما دخلت مستشفى .

فقالت زينب كأنما تبعد عن ابنتها مكروها:


_ ولا عمرك ح تدخوليها يا بنتي إن شاء الله .

والتفتت إلى جلال وقالت له :

_ خلاص ح تولد هنا .

وأسقط فى يد جلال ونظر إلى حماه فى عتاب ؛ وأحس حسين أنه يقول له دون أن ينطق حرفا : « ليه خذلتنى ؟ » فأطرق حسين وتحاشى أن تلتقى عيناه بعينى زوج ابنته .

واستأذن جلال ونهض فنهضت أحلام ، وانصرفا والأم تودعهما



ودخل الأب يخلع ملابسه . وفى أثناء عودة زينب مرت بسوسن فإذا بسوسن تعترض طريقها وتقول لها :

ــ ماما . . أنا عايزه استعمل اللولب .

فلكزتها أمها في صدرها ثم وضعت يدها على فمها وقالت لها :

__ ح اقطع لسانك .

فقالت سوسن في براءة:

ــ وانا مالى ، ما التلفزيون بيقول استعملوا اللولب .

ـــ قطيعه تقطعك وتقطع التلفزيون . لمى لسانك قبل ما اهرسك برجليه .

و لم تخف سوسن و لم تدخل لسانها في حلقها ، كان هناك شيئا تريد أن تعرف فقالت في هدوء :

ـــ يعني إيه اللولب يا ماما ؟

وراحت زينب تتلفت في حيرة ، إنها تحس أنها وقعت في فخ فلم تجد لها منفذا إلا أن تنهر ابنتها ، فقالت لها :

_ يعنى اتكتمى بقى وريحيني من غلبتك دى .

دق جرس الباب فهرعت سوسن تفتح فإذا بسامي وجيهان يدخلان وإذا بدهشة عريضة ترتسم على وجه الأم ، وقالت جيهان في هدوء : __ مساء الخير .

فقال حسين دون أن يظهر في وجهه أي انفعال:

_ مساء النور .

ورمقته زينب في استغراب كيف أن ما يراه لا يثير غضبه ولا يُبعل الدم يفور في عروقه ؟ إنها همت بأن تعترض على ابنها الذي خدش حرمة البيت الذي كان في قدسية الجوامع قبل أن يدنسه الجيل الجديد بتصرفاته الوقحة الحمقاء ، إلا أن حسين نظر إليها نظرة حازمة شلتها عن كل حركة وإن لم تخمد النار المتلظية في أحشائها ، وقال سامي قبل أن يدخل غرفته خلف جهان :

_ اعملي لنا شاي والنبي يا ماما .

وكاد ذلك يفجر ثورتها وإذا بحسين يقول في حزم :

_ اعملي لهم شاي يا زينب .

و فطنت الأم بغريزتها إلى أنها إذا ثارت فسيقف الأب إلى جوار ابنه ،

فرأت أن خير ما تفعله ألا تثير زوبعة في غير أوانها وأن ترصد الريح حتى إذا ما كانت معها أثارتها عاصفة لا تهدأ حتى تقتلع ذلك الخطر الذي يهدد أمن بيتها .

والتفتت إلى مراد وقالت له :

_ اعمل لهم الشاى .

ودارت على عقبيها لتنسحب بعيدا لتعبر من استيائها ، وقبل أن تغيب في حجرتها قالت :

_ ادخل يا مراد ذاكر معاهم .

ورفت بسمة هادئة على وجه حسين وأراد أن يلحق بزوجته يحاورها ، فقال لسوسن وعاطف اللذين كانا جالسين أمام التلفزيون : ___مش كفايه بقى وروحوا ذاكروا .. أفتكر لو امتحنوكوا فى برنامج التلفزيون تاخدوا عشره من عشره .

فقالت سوسن :

ـــ والنبي ح اذاكر يا بابا لما تخلص الروايه دى .

وانسحب حسين وذهب إلى حيث زوجته فألفاها تضع يدها على خدها فقال لها:

_ مالك ؟

__ عاجبك اللي حصل ده ؟ عاجبك يجيبها لغاية هنا واحنا قاعدين نتفرج ؟

ـــ ما هي معاه طول النهار في الجامعه .

فقالت وإن أحست أن منطقها قد يهتز:

- _ هناك ناس كتير .
- ـــ وهنا أهم تحت عنينا والباب مفتوح .
 - _ بس اشمعني البت دي ؟
- ــــ زميلته ، فيها إيه لما اتنين يذاكروا مع بعض .
- - ـــ وفيها إيه لو ذاكرت بنت وولد ؟
 - فقالت وقد نهضت غاضبة:
- ـــ يا نارى ، فيها كتير يا سى حسين ، فيها كتير قوى واللا انت نسيت ؟

ولمعت عيناه ووأد بسمة أرادت أن تولد على شفتيه . فقد كان يلذ له الحوار الذى يدور بينهما وإن أصابه بعض رذاذ لسانها . وراحت تغدو وتروح فى غضب ، ووقفت فجأة فقد أنارت فكرة فى ذهنها فقالت :

__ ما هى نبيلة فى الجامعه ، تقبل إن نبيله تذاكر مع زميل لها فى بيته أو فى بيتها ؟

فقال ببرود:

ـــ الموضوع ده ما بقاش يخصني ..

و لم تحتمل ذلك القول فقالت في غضب:

__ أمال يخص مين ؟

و لم يخرجه غضبها عن هدوئه قال :

ـــ يخص شفيق .

ولمحت سامى يخرج بصينية الشاى ويذهب بها إلى المطبخ ثم يعود ويغلق الباب خلفه ، فدارت على عقبيها وقالت حانقة :

ــ أهو الباب اتقفل يا سي حسين ، أنا ما اطقشي كده .

وذهبت وفتحت الباب وإذا بسامي وجيهان منهمكين في المذاكرة ، فرفع سامي رأسه وقال في صدق :

- اقفلى الباب من فضلك يا ماما ، صوت التلفزيون بيشوش علينا . و لم تجد مفرا من إغلاق الباب فإذا بها تغلقه في هدوء وإن لاح في وجهها الضيق وارتسمت فيه الهزيمة ، ودارت على عقبها فألفت حسين واقفا يرقها ، فلما رآها حانقة تغادر المكان منكسرة ارتسمت على شفتيه بسمة عريضة .

وعاد الزوجان إلى غرفتهما ، وأراد حسين أن يحول الحديث إلى ناحية أخرى فقال وهو يفحصها بعينيه :

ــ يعنى خلصتي الكورس ولا خستيشي .

وأخذت ، لم تكن تنتظر أن يحاسبها زوجها أو يثير مرة أخرى ذلك الموضوع فارتبكت وقالت :

_ لأ خسيت .

_ مش باین علیکی .

فقالت وهي تتحاشي نظراته:

ــ خسيت اتنين كيلو .

(الحفيد)

__ یعنی استبدلت جنیه من معاشی عشان تخسی اتنین کیلو ؟!
ورأت أن خیر ما تفعله أن تتملقه .. إنها أنفقت ستین جنیها دون
جدوی ، أرغمته بدموعها علی أن یستبدل من معاشه جنیها فقالت وهی
تدنو منه و تداعبه :

_ أخس ازاي وانت مهنيني ومريحني على الآخر ؟

و لم يشأ أن يقسو عليها أكثر من ذلك فقال لها :

_ فداكى مش ستين فداكى ستايه .

وأثلج ذلك صدرها وأطمعها فيه فقالت له :

ـــ أنا مهدود حيلي طول النهار ، والنبي يا حسين تروح تغسل فناجين الشاى اللي خرجت من عند ابنك .

واستراح خسين . إنه استطاع أن يكبح جماح ثورتها بل روضها وجعلها تقبل الأمر الواقع . فإن كان سيغسل فناجيل الشاى فذلك أهون من تعب نفسه وتحطيم أعصابه ، ونهض وسار إلى المطبخ وراح يغسل ما في الحوض إذا بسوسن تقبل وتقول له :

- _ عايزين ناكل .
 - _ تاكلوا إيه ؟
 - ــ ناكل بيض .

وانهمك فى إعداد العشاء ثم حمله إلى غرفة الطعام ونادى أولاده ، وجاءت زينب فقال لها وهو يرمق الغرفة التى فيها سامى وجيهان :

_ مش ندخل لهم عشا ؟

فقالت في امتعاض:

ــ يا خويا .

و لم يشأ أن يوقظ الفتنة النائمة فسكت وراحوا يأكلون حتى إذا ما أتوا على ما أمامهم التفتت سوسن إلى أمها وقالت :

__ ح نحلی إیه ؟

وهرعت إلى حيث العلبة وفتحتها فإذا بها تجد فيها قطعة شيكولاتة وقطعة ملبن ، فأحذت لنفسها الشيكولاتة وقدمت الملبن لعاطف وهي تقول لمراد .

_ مش الملبن أحسن من الشيكولاتة ؟

فقال مراد في خبث :

ـــ ما اقدرش اقول إلا لما أدوق .

وقدمت سوسن إليه الشيكولاتة فقضم قضمة وقدم إليه عاطف الملبن فقضم قضمة ثم قال :

ــ الاتنين حلوين ، ما وحش إلا قلتهم .

وغادروا غرفة الطعام إلى الصالة فإذا بالباب المغلق يفتح وتخرج منه جيهان ومن ورائها سامى ، والتفتت جيهان إلى سامى وقالت :

... أنا ذاكرت عندك النهارده ، انت تذاكر عندى بكره بقى .

وحيت من في الصالة ثم انصرفت وسامي معها ليوصلها ، وما أن أغلق الباب خلفهما حتى قالت الأم في سخرية :

ـــ تعال يا ابويا شوف ، قال كان يسود عيشتي إن عرف إني فتحت

شباك ، قال شباك قال ..

وقال عاطف معجبا بذكائه:

ـــ مش مذاكرة سامي مع جيهان ح تنتهي بالجواز .

فقالت له الأم غاضبة:

_ إيه الكلام الفارغ اللي بتقوله ده ؟

و لم يعجبه أن تعترض أمه على قوله وأن تنهره فقال :

ــ مش كل روايات السينها تنتهي بالجواز .

كانت سيارة تنطلق وقد جلس شفيق خلف عجلة القيادة وإلى جواره نبيلة ، وجلس جلال فى المقعد الخلفى وإلى جواره أحلام . كانت السعادة ترفرف على الجميع وكان الحديث بينهم يسرى رخاء كالنسيم وإذا بالسيارة تهتز فى عنف . لم يكن الطريق ممهدا إذ كانت به حفر من أثر مد مواسير أو من أثر شيء آخر ، فالظاهر أن رجال المرافق ينقبون فى جوف القاهرة عن كنز دفين .

وارتفع جلال فى الهواء ، ولما استقر مرة أخرى على مقعده قال وهو ينظر إلى بطن أحلام :

- _ حاسب على الولد .
- _ وإيش عرفك إنه ولد ؟
 - فقالت نبيلة مداعبة:
- __ أحلام ح تجيب بنت و بنت و بعدين ولد زى ماما . . دايما البكريه تجيب زى امها .
 - فالتفت شفيق إلى زوجته وقال :
- ـــ تلاته مره واحده ، حد يقدر يصرف على تلاته في اليومين دول ؟

فقالت أحلام فهي معجبة دائما بأبيها:

__ أمال بابا يعمل إيه ؟

فقال شفيق في حماس:

_ باباكي ده يستحق تمثال .

فقال جلال:

_ عاش ليكو حرم نفسه من كل شيء وما حرمكوش من حاجه .

فقاطعه شفيق:

_ لأيا عم أنا عايز أعيش لنفسى .

فقالت أحلام في إنكار:

ـــ یعنی مش ح تخلف ؟

فوضع ذراعه خلف نبيلة في حب وقال:

ـــ أنا متفق أنا ومراقى إننا ما نجبش عيال قبل ما تخلص الجامعه ، يعنى لسه قدامنا تلات سنين كان .

فقال جلال:

_ الكلام ده إن شدت حيلها ومشيت على طول .

فقال أحلام:

ــ طول عمر نبيله واخده بالها من نفسها ، مش عايزه تروح الجامعه وبطنها سابقاها .

فقال جلال:

ــ مش شايف إن فيها حاجه إنها " كه ن حامل وتروح الجامعه .

فقال شفيق:

_ فيها حاجه بالنسبه لي أنا .

فقال جلال:

_ فيها إيه ؟

_ إن جبت عيل يبقى لازم أبيع العربية على طول ، ما اقدرش ساعتها أصرف على بيتين . . العيل والعربيه . . وانا العربيه أحسن لى دلوقت .

وكانت السيارة قد وصلت إلى مكان هادئ من كورنيش النيل فوقف شفيق و نزل من السيارة و فتح الباب الخلفي ، فنزلت أحلام ثم جلال ، وكانت نبيلة قد نزلت ووقفت تنتظرهما فلما أصبحوا جميعا على الرصيف قال جلال لأحلام وأحتها :

_ ح تتمشوا قد إيه ؟

فقالت أحلام:

_ نص ساعه .

_ طب احنا ح نستني هنا .

وراحت أحلام ونبيلة تمشيان الهوينا على كورنيش النيل . كانت الشمس تنحدر للغروب فكان المنظر شاعريا أخاذا يعكس ما فى الطبيعة من جمال على النفوس فأخذت أحلام ونبيلة تتسامران ، وطفق شفيق وجلال يتحاوران ؛ كان شفيق يحسد جلال على أخذه للأمور فى بساطة ويتمنى لو يستطيع أن يكون مثله راضيا ولكنه قلق على الدوام يحس أن بينه وبين الدنيا خصاما .

وقبل أن يمر الوقت الذي حدداه عادت أحلام ونبيلة والعرق يتصبب من نبيلة وقد بدا عليها الإرهاق ، فهرع إليها شفيق وقال :

_ مالك ؟

فقِالت أحلام:

_ يا دوب مشينا شويه لقيتها داخت ، قعدتها لغاية ما فاقت .

فقال شفيق:

ـــ ياللا نروح عشان نسترنيح .

فقال جلال:

ـــ من رأیی نعرضها علی دکتور ؟

فقالت نبيلة في تخاذل:

ــ أنا كويسه دلوقت .. ما فيش لازمه .

فقالت أحلام:

ـــ نشوف دكتور أحسن ؟ .

وركبوا وانطلقوا إلى عيادة دكتور يعرفه جلال ، فلما فحصها خرج

إلى المنتظرين في الخارج وقال لهم :

_ مبروك .. الست حامل .

وظهرت دهشة كبيرة على وجه شفيق ، وقالت أحلام في ارتياب :

ـــ حلوه دی .

وقال جلال لشفيق ساخرا :

ــــ مبروك .. روح بيع العربيه .

وظل وجه شفيق مسودا وهو كظيم ولولا بقية من حياء لعض أنامله من الغيظ . وخرجت نبيلة ، ولما رأت زوجها قرأت في وجهه الحزن فسارت مطرقة وإن كانت تفكر في العاصفة التي ستهب إذا خلاكل منهما بصاحبه .

وعادوا إلى السيارة صامتين وانطلقت بهم وهم في شرودهم ، وظل شفيق ونبيلة يغشاهما وجوم حتى إذا ما أغلق عليهما باب شقتهما انفجر شفيق في غيظ :

_ عاجبك كده .. ده اللي اتفقنا عليه ؟

فقالت في تخاذل:

_ وانا كنت اقدر اعمل إيه ؟

__ كنتى تقدرى تعملى كتير . . أنا كنت حاسس ليلة ما وصلت أمك ورجعت انك بتغشيني ، ليه عملتي كده ؟ . . ليه غشتيني ؟ . .

وأطرقت نبيلة و لم تنبس بكلمة ، وراح شفيق يعمل في سرعة فدنا منها وقال :

_ لكن معلش ، ملحوقه .. اللي في بطنك ده لازم ينزل .

فشدت نبيلة قامتها وقالت في تحد:

_ مستحيل .

فقال لها في حزم:

__ أنا مش ح اسمح لك إنك تحطمي كل اللي بابنيه ، مش ح اسمح لك إنك تضيعي مستقبلي . . اختاري بيني وبينه .

فقالت نبيلة في إصرار:

_ مش ح انزله أبدا .. أبدا .

فقال في انفعال شديد:

ــ خلاص .. إنت حره .

كانت زينب تستشعر قلقا لا تدرى مصدره وانتابتها هواجس ، فأرادت أن تشرك الآخرين في مشاعرها فقالت :

_ اللهم اجعله خير . . عيني الشمال بترف .

فقال لها حسين الذي كان يساعد سوسن على حل واجبانها:

ـــ روحی حطی فیها قطره .

وجاء سامي وقال لها:

_ لما تيجي جيهان ابقي هنيها يا ماما .

فقالت له أمه في ضجر:

_ يا بني ابعد عني دلوقت ، باقول لك عيني الشمال بترف .

فقال سامي نافد الصبر:

ـــ هو أنا باقولك حاجه وحشه ، باقول لك لما تيجى جيهان ابقى هنيها .

_ اهنيهاعلي إيه ؟

_ على إنها اتخطبت .

ولفت الحوار نظر حسين فترك سوسن واقترب يرهف السمع ، سمع

زوجته تقول :

- _ ولما اتخطبت ح تيجي ليه ؟
 - __ ح تیجی تذاکر .

فقالت زينب في دهشة:

_ وخطيبها عارف إنها ح تجيلك ؟

. _ عارف إنها ح تيجي تذاكر .

فالتفتت فرأت زوجها فقالت :

_ سامع یا حسین ؟ خطیبها عارف إنها ح تیجی تذاکر مع ابنك .

فقال حسين في هدوء :

ـــ وفيها إيه ؟

و لم تحتمل ذلك و لم تستطع أن تتصوره فقالت في غيظ:

ــ يا خواتى رجالة إيه دول ؟ رجالة آخر زمن .. رجاله قش .

والتفتت إلى سامي في شك وقالت :

_ ما تقول يا بني .. إنت راجل واللا إيه ؟

وأحس سامي أن كرامته قد جرجت فقال :

ـــ يا ماما انتى،من زمن غير زماننا .

فقالت زينب :

__ الحمد لله إنى من زمن تانى .

وصمتت قليلا ثم قالت:

__ جوزها ده بیشتغل إیه ؟

- _ طالب في الجامعه معانا .
- ـــ ولما هو معاكو ما تذاكر معاه .
 - ... ده في السنة النهائية .
- __ طيب ما يذاكر لها بدل ما يسبها لك!
 - فقال حسن مداعبا زوجه:
 - _ انت طيبه طيبه بس يا خساره .
 - فقالت زينب في فزع وتحفز:
 - __ بس يا خساره إيه ؟
 - _ سوء ظنك بالناس .
 - فالتفتت إلى زوجها وابنها وقالت :
- ده اللى بيجرى فى عروفكم بقى مايه مش دم ، ومايه ساقعه كان . ودق جرس الباب فأسرعت زينب وفتحته ، فإذا بها أمام جيهان وجها لوجه وإذا بها تقول لها :
 - ـــــ مبروك .
 - فيتهلل وجه جيهان بالفرح وتقول :
 - __ الله يبارك فيكى .
 - وفوجئت زينب بأن جيهان تقبلها فقالت لها :
 - ـــ والله فرحت لك قوى يا بنتى .
 - ـــ مرسى يا تانت .
- ـــ ده خطیبی .. بیذاکر ، السنه دی آخر سنه عنده ، إن شاء الله

أجيبه ونيجي نزوركم .

وكان حسين وسامى يتابعان الحديث الودى فى دهش ، فأين زينب التي تكاد تذوب رقة وهى تحدث الفتاة من زينب الثائرة الحانقة التي كانت تقذف من فيها ألسنة نار ؟!

ودخلت جبهان ودخل من حلفها سامي ، وما إن جلسا للاستذكار حتى جاءت زينب وأعلقت عليهما الباب في رفق وقالت :

ــ ربنا ينجح مقاصدهم .

ولما وصلت زينب إلى حيث كان زوجها قال لها:

_ إيه الرقه دى كلها ؟ إيه اللي جرى في الدنيا ؟

فقالت زينب في هدوء:

ـــ مدام اتخطبت ربنا يهنيها . . أنا كنت خايفه لتلهف الواد .

فقال حسين ليغيظها:

ــ ما ح تلهفه و احده تانيه ، إيه الفرق بين التانيه دى وبين جيهان ؟

ــ التانيه دى أنا ح اختارها على عيني .

وتذكرت عينها الشمال .. إنها هدأت الموقف وتركت كل شيء يمر في سلام لتقضى على مخاوفها التي استولت عليها ، إلا أن عينها الشمال لا تزال ترتعش فقالت :

ــ لسه عيني الشمال بترف .. اللهم اجعله خير .

ورن الجرس الخارجي فهرعت سوسن تفتح الباب فألفت نبيلة وقد حملت حقيبة كبيرة ، فصاحت سوسن قائلة : ــ أبله نبيله جتُ .. معاها شنطه كبيره .. باينها مسافره ؟ .

والتفت حسين إلى زينب فى ذعر فقد غلص قلباهما لما سمعا من سوسن إعلان وصول أختها ، وزاد فى جزعهما خبر الحقيبة الكبيرة التى تحملها . وقال حسين فى صوت فيه رنة أسى :

_ یا تری جت لیه ؟

_ مش عارفه .. خليك انت هنا لما اشوف إيه .

وذهبت زينب وتصنعت الهدوء واغتصبت ابتسامة وقالت في ترحيب لما رأت ابنتها وإن كان قلق بالغ يدثرها:

_ أهلا .. أهلا .

ومدت يدها تحاول أن تحمل عن ابنتها الحقيبة ، ولكن نبيلة أبعدت الحقيبة عن متناول يد الأم وسارت شاردة تحاول أن تجمع شجاعتها التى تناثرت وأن تحبس الدموع التى تريد أن تطفر من مقلتها ، إلا أن غريزة الأم كشفت كل شيء ، فطنت إلى أن ابنتها في محنة فإذا بالأسى يغمر عواطفها وإذا بلهفة على أن تعرف أسباب مقدم ابنتها تستولى عليها ، فما أن صارتا في غرفة البنات وحدهما ووضعت نبيلة الحقيبة على السرير حتى قالت الأم :

_ إيه اللي جرى يا نبيله ؟

فانفجرت نبيله باكية ، فأسرعت الأم تضمها إلى صدرها وتقول وقد ترقرقت الدموع في عينيها :

ـــ بس يا بنتي بلاش عياط وقولي إيه اللي جرى .





- _ شفيق .
 - _ ماله ؟
- _ زعل لما عرف إنى حامل.
- ــودى حاجه تزعل ؟ ده أمره غريب .. زعل بدل ما يفرح ؟!
 - ـــ وطلب منى إنى أنزل اللي فى بطنى .
- ـــ اوعی یا نبیله یا بنتی ، تروحی فیها ، والله لو کان جرالك حاجه
 - ما كان يكفينى فيكى هو ولا عيلته كلها .

فقالت نبيلة وهي تنشج بالبكاء:

- ـــ ده قال : لانا لهوه .
- _ لأ هوه .. ده هو من لحمنا ودمنا ، هو حد ينزل اللي ف بطنه إلا إذا كان ابن حرام !
 - _ يا ماما أنا مش ح انزله مهما يحصل .
- ــــتنزلیه ازای ؟ ده ضناکی ؟ حدیموت ضناه بایدیه ؟ و تروحی من ربنا فین ؟

وساد بينهما صمت لحظة ثم قالت الأم:

ـــ روحی اغسلی وشك وغیری هدومك ، بیت أبوك اللی ساعك قبل ما تتجوزی يساعك بعد ما تجوزتی ، ده احنا نشيلك جوه عنينا .

وفتحت نبيلة الحقيبة فإذا بها ملابسها ، فأخرجت قميص النوم وانطلقت زينب إلى حيث كأن حسين قلقا أرقا ، فما أن رآها حتى خف إليها يقول لها في لهفة :

- حصل إيه ؟
- _ شوية نقار بينها وبين شفيق .
 - _ سببه إيه ؟
- ـــ عرف إنها حامل زعل وعايز ينزله .
 - ـــ و ح تعمل إيه دلوقت .
- _ ح تفضل معانا لغاية ما ييجي ياحدها ورجله على رقبته .

كانت أحلام تسير وقد ازداد بطنها انتفاخا و لم تكن تحس نفس الانشراح الذى كانت تستشعره كلما خرجت لتتمشى فإنها منذ غضبت نبيلة وعادت إلى بيت أبيها أمست تخرج وحدها وفي النفس أسى ، فما كان يخطر لها على قلب أن يصل الحب الذى كان بين نبيلة وشفيق إلى مثل ذلك الجفاء البارد الثقيل .

وكان جلال يسير إلى جوارها صامتا ؛ وكان ذهنه مشغولا بما كان بين نبيلة وزوجها. إن صداقة متينة كانت توطدت بينهم جميعا فإذا بغياب نبيلة وشفيق يترك فراغا في حياته يسبب له ضيقا ، وما كان بقادر على أن ينفرد بأفكاره فقال :

- _ إيه اللي عمله شفيق ده ؟ بقى ده معقول ! أنا ح اروح اكلمه . فقالت أحلام في إشفاق :
- بلاش یا جلال . إن كلمته ح يركب راسه ، وإن عرفت نبيله ح تزعل .
 - ـــ وإيه اللي ح يزعلها ؟
 - ــ كلامك لشفيق عشان يرجعها ح يجرح كرامتها .

_ كلام إيه ده ؟ أمال فين إصلاح ذات البين .

ـــ إن كلمت شفيق ورجعها يبقى عشان خاطرك مش عشان خاطرها ، وإن رفض يصلحها تبقى أسأت وزودت الخلاف ، أنا رأيي إنك تسيبه لغاية ما يرجع لعقله .

فقال ضيقا بحديثها:

ـــــ ما هو لو فكرنا فى كرامته وفى كرامتها مش ح نعمل حاجه . أنا ح اكلم شفيق .

وكانت احلام فى قرارة نفسها تتمنى أن يقوم زوجها بتلك الوساطة ، أن يعيد أختها إلى بيتها ، فليس للمتزوجات غير بيوتهن وإن فتح الآباء أذرعهم مرحبين . كانت أمها تقول لها دائما « هى الواحده تستريج إلا فى بيتها ؟ » ، وكانت تعجب من قولها قبل أن تتزوج ، أما وقد تزوجت وأصبح لها مملكة صغيرة ترعاها فقد عرفت حقيقة ذلك القول .

وسارا يتحدثان ثم عادا إلى البيت سيرا على الأقدام ، وصعدت أحلام لتستريح من رياضتها التي فرضت عليها وانطلق جلال لا يلوى على شيء . كان شفيق في البيت وحده تبدو عليه الكآبة والسأم إنه اعتاد أن يجد

نبيلة فى انتظاره ، وإذا خرج خرجت معه . صارت جزءا من حياته . إنه لا يدرى لماذا تطوف بذهنه أسعد أيامه معها منذ أن غادرت البيت . إنه يذكر ليلة الزفاف ، فلو أنها كانت ليلة بسيطة إلا أنها كانت مترعة بالمتعة التى استقرت فى أغوار نفسه .

إن المتعة الحسية سرعان ما تتلاشي ، ولكن متعة اتصاله بها لم تكن

متعة مادية فحسب بل كانت امتزاج روح بروح ، ذوب نفس فى نفس . ولولا أنه بطبعه لا يحب أن يكشف عن حقيقة مشاعره لظل يقول لها إنه يحبها . . يعبدها ، إلا أنه كان فى قرارة نفسه يعتقد أن تعرية الحب تفسده كا أن الطعام يفسد إذا ما تعرى .

ووسوست له نفسه في لحظات أنه كان قاسيا معها يوم أن ثار في وجهها لأنها حملت ، واتهمته بمجافاة المنطق والدوق : ولكن غروره ثار على تلك الثورة وراح يقنعه بأن ما فعله كان جزاء وفاقا على أن حدعته وحملت على الرغم مما كان بينه وبينها من اتفاق .

طرق جلال الباب فنهض شفيق وقد تصارعته أحاسيس متباينة . ترى أعادت نبيلة لتعتذر ؟ ولم يصدق ذلك الخاطر فهو يعرفها شديدة الحساسية ، شديدة الاعتزاز بكرامتها ، فإذا لم تكن نبيلة فمن يكون ؟ وفتح الباب فإذا بجلال أمامه ، ومد بصره من فوق كتف جلال ففطن جلال إلى ما يرمى إليه فقال له :

- _ ما تخافش دانا لوحدى .
 - __ أمال فين أحلام ؟
- فقال جلال ليفتح بابا للحديث:
- __ ح تیجی لمین یا سی شفیق ؟ اللی کانت بتیجی لها مش هنا .

وانطلقا إلى حيث كان شفيق جالسا فوقعت عينا جلال على منفضة السجاير ، إنها تكاد تطفح بأعقاب السجاير فقال جلال :

_ إيه ده كله يا شفيق ؟ إنت كنت بتشرب خفيف .

ولاحظ الوجوم الذي كسا وجهه فأراد أن يرده إلى طبعه حتى يستطيع أن يتجاذب معه أطراف الحديث دون ثورة أو انفعال . فقد يده وراح يقلب في أعقاب السجاير ثم ابتسم وقال :

ـــ براءة ، ما فيش ولا عقب فيه روج .

وابتسم شفيق وقام وهو يقول:

_ قهوه واللا اجيب لك حاجه ساقعه ؟

__ إذا كان ضرورى هات حاجه ساقعه ، مين عندك ح يعمل القهوه .

وأحس شفيق أن جلال ماجاء إلا ليحادثه فى موضوع زوجه ، فسار إلى الثلاجة على مهل يفكر ويرتب أفكاره ، ثم عاد ليحمل زجاجتين ليمونادة وجلسا يشربان . قال جلال :

__ إيه اللي عملته ده يا شفيق ؟ بقى نبيله تستاهل منك ده ؟ فقال شفيق وقد بدأت دماؤه الحارة تتدفق في عروقه :

_ و كنت عايزني أعمل إيه ؟ اتفقنا على حاجه و كان كله برضاها ، نمت و صحيت عرفت انها كانت بتكذب على ، كانت بتخدعني .

__ ما تقولش كانت بتخدعك ، دى كلمه كبيره قوى ، الناس تفتكر ايه ؟

ـــ أمال اللي تبقى عايشه معاك شهرين وكاتمه عنك سرها تُبقيٰ إيه ؟ ـــ يمكن ما كانتش عارفه .

ــ يا ريت ، دى كانت مدبره كل شيء ، دا اللي غايظني .

جاءت أحلام وجلال إلى منزل أبيها فى الشهر الأخير ، فوجدت أن من الأسلم أن تكون إلى جوار أمها فإذا ما فاجأها المخاض كانت بين أهلها فى رعايتهم جميعا ، وهرعت نبيلة إليها تقبلها فقال سامى معلقا : __ ولاد الخاله يجوزوا لبعض ، ابعدى بطنك يا أحلام عن بطنها .

وأشرق وجه الأم بابتسامة عريضة وغمرها سرور فياض ، وكان حسين تتنازعه عواطفه لا يدرى أيفرح أم يرثى لنبيلة التي كانت أشبه بأرملة وإن كان زوجها على قيد الحياة .

وقالت سوسن وهي تجذب أحلام من ثوبها:

ـــ أبله أحلام ، عارفه ح تنامى فى سريرى الليله دى ، أبله نبيله بتنام فى سرير هاله .

فمالت أحلام وقبلتها وقالت لها:

ـــ كتر خيرك يا حبيبتى .

وقال مراد فی سذاجة :

ــ الحمد لله إنكم جيتوا بعد الامتحانات ما خلصت

ونظر إليه أبوه نظرة تأنيب ، فأطرق مراد وإن لم يفهم سبب نظرات العتاب التي رماها بوه بها ، وأقبل عاطف يحمل الكلب فقالت الأم

عاضبه:

_ قلت لك الكلب ده ما ينزلش م السطح أبدا .

فقال عاطف مبررا ما فعل:

__ أنا لقيت العيله كلها هنا ما فيش حد غايب إلا سوزى ، قلت اجيبه .

وضع الكلب على الأرض فراحت أحلام تمسح له شعره في حنان وتداعبه وتناديه :

ـــ سوزى .. سوزى .

والتف الأولاد حول سوزى يلاعبونه ، وإذا بفكرة تطرأ على ذهن مراد فيقول :

ـــ نسیب أحلام و نبیلة ینادوله ، اللی یروح لها منهم تبقی ح تجیب ولد .

وعلى الرغم من سذاجة الفكرة فقد تأخر الجميع وتركوا أحلام ونبيلة تحاول كل منهما أن تغرى سوزى ليتجه إليها . وقد صادفت اللعبة هوى في نفس زينب فتقدمت ترقب التجربة ، أما حسين فقد منعه وقاره أن يشارك صراحة فيما أثار الحماس بين الجميع .

وذهب الكلب إلى نبيلة ثم عطف على أحلام ، فإذا بزينب تتهلل بالفرح وتقول :

ـــ الاتنين ح يجيبوا ولاد .

وأشرق وجه الجميع بالغبطة ، وإذا بجلال يقول لحماته :

ــ بتحبى يا تانت الأولاد أكثر .

فقالت زينب في إنكار:

_ أبدا والنبي يا ابني ، كلهم معزه واحده .

فقال سامي وهو يشير إلى سوسن:

_ بقى أنا عندك زى المفعوصه دى ؟

ــ وتزيد عنها إيه ؟ لك طرطور واللا على راسك ريشه ؟

ورن جرس الباب فأسرعت سوسن إليه وكانت تسابق عاطف الذى حرى وجرى الكلب خلفه ، فلما فتحت الباب ظهرت جيهان فإذا

بالكلب ينبح ، فتقهقرت وقالت : .

_ حوشوا الكلب ده ."

فهرع سامي ونحاه وقال لها:

ــ اتفضلي .

و دخلت جيهان وأحلام ترنو إليها في دهش ، وزادت دهشتها لما سمعتها تقول لسامي :

ــ مبروك يا سامي ، نجحنا .

فقال لها سامي في انشراح:

ــ مبروك يا جيهان .

ودارت على عقبيها وقالت :

_ عن إذنكم .

فقال حسين :

ـــ ما بدری ، اقعدی استریحی .

ــ ما اقدرش ، بابا مستنى تحت .

فقالت لها زينب:

ـــ ابقى تعالى .

ــ من عيني يا تانت .

_ تعرفي تفصلي ولا تخيطي ؟

ــ طبعا يا تانت .

فقالت زينب وهي تشير إلى بطن أحلام ونبيلة :

ــ تبقى تيجى تساعدينا في خياطة هدوم النونو والنونو .

__ حاضر يا تانت .

وانصرفت جيهان وقالت أحلام :

ــ ما قعدتش ليه ؟

فقال مراد :

_ أصل أبوها تحت .

_ طب ما طلعش ليه ؟

فقالت زينب في لهجة عادية من كثرة ما كررت العبارة:

سان ريب ي مجه حاديه من حرب ما مررت المباره بينكسف .

وقالت أحلام :

ـ عروسه حلوه يا ماما .

ــ دى بتذاكر مع سامي و مخطوبه .

-1.4-

وقالت نبيلة في خوف:

_ أنا ح اروح بكره أشوف نتيجتي .

فقال حسين :

_ مصمونه . ما تتعبيش نفسك .

والتف مراد وعاطف وسوسن حول سامي وقالوا له:



_ انت عايز تاكل علينا الحلاوه كلنا ؟ _ أبدا ، حالا ح احلى لكم بقكم . وذهب إلى أبيه وقال : _ كلهم طالبين حلاوة النجاح .

فقال حسين في بساطة:

_ طیب ما تجیب لهم .

ـــ واجيب لهم منين ؟ ما فيش فلوس .

فقال حسين دون أن يتبرم أو يظهر عليه أي أثر للضيق :

ــ المحفظة في جيب الجاكته جوه ، خد اللي انت عايزه .

كان حسين سعيدا لنجاح ابنه وكان واثقا من نجاح نبيلة فلم يشأ أن يجعل أى شيء يؤثر على انشراح صدره ، وكان على استعداد لأن يفعل كل ما في وسعه ليجلب السرور إلى قلوب أبنائه .

و دخل سامى و فتح حافظة أبيه فلم يجد فيها نقودا كثيرة ، فسحب منها جنيها وأعادها إلى مكانها وهو يحس نحو أبيه حبا عظيما امتزج بإشفاق على الرجل الذى يحرم نفسه ليجود على فلذات أكباده . وهبط سامى مهرو لا فإذا بعاطف وسوسن يجرون خلفه ليلحقوا به ، فإنه لمنظر يرضى غرورهم أن يروا أخاهم الأكبر يشترى لهم حلوى بجنيه .

وعاد سامي يحمل صندوق الجاتوه وراح يسأل وهو يستشعر أهميته: ـــ الشاي جاه: ؟

فقالت زينب وهي تدفع أحلام ونبيلة أمامها :

_ كل حاجه جاهزه .

و دخلوا غرفة السفرة وجلسوا يشربون الشاى ويأكلون الجاتوه . وتلفت عاطف وفي غفلة من الجميع أخذ واحدة وانطلق إلى سوزى وراح يطعمها للكلب فما كان يستطيع أن يحتمل أن تأكل الأسرة كلها ويحرم

الكلب.

وتلفتت نبيلة تبحث عن شيء .. إنها في حاجة إلى كوب ماء . فلما لم تجد قالت لمراد :



ـــ والنبي يا مراد ناولني كباية ميه .

ونهض مراد متبرما وقال لنفسه وهو في طريقه إلى المطبخ :

ــ هو احنا بنجوزهم علشان يرجعوا لنا تاني !

وعاد مراد يحمل كوب الماء وقدمه إلى نبيلة وقال:

ــ اتفضلي .

وقبل أن يجلس قال :

_ حد عايز حاجه قبل ما اقعد ؟

فقال له سامي ليغيظه:

_ ح تقعد ليه ؟ ما كل حاجه خلصت .

وظهر الضيق في وجه مراد .. أأرسل ليحضر ماء ليحرم من الجاتوه ؟

و لم يطل ضيقه فإن زينب قدمت له واحدة وهي تقول له :

ــ ما تزعلش .. أنا شلت لك دى .

وتناولها مراد وراح يقضمها وهو واقف فما كانت تستأهـل أن يجلس . ونهض حسين وقال :

ــ اتمسوا بالخير.

وذهب إلى غرفة النوم ، وقالت زينب لهالة وعاطف :

ــ تعالوا انتوح تباتوا معانا من النهارده .

فقالت أحلام:

ــ خلى هاله تنام جنبي وعاطف ينام جنب نبيله .

فقالت الأم وهي تبتسم .

ــ هو ده معقول ؟ دول بيرفسوا طول الليل .

فقالت أحلام في أسف:

_ ح نضايقكو .

ــ ما تقوليش كده .. السرير واسع يساعنا وزياده .

ودخلت زينب إلى غرفة النوم تسوق أمامها عاطف وهالة . وما أن أغلقت البابا حتى راحت تقرش لعاطف فراشا على الأرض وأنامت هالة بينها وبين حسين . وما أن أغمضت هالة عينيها حتى تحركت بحيث أمسى رأسها في بطن أمها ورجلاها على بطن أبيها .

كانت أحلام في سريرها ونبيلة في سريرها وقد راحت نبيلة في النوم .
كانت تتحدث كعادتها في نومها وما كانت أحلامها تدور حول المدرسة وما فعلته في يومها كما كان ذلك شأنها قبل أن تتزوج ، بل كانت تحلم بشفيق ، فما أكثر ما نطقت اسمه في حنان وما أكثر ما نادته وهي غاضبة . وكانت أحلام تتلوى من الألم . إنها كانت تحس أن شيئا يتحرك في أحشائها ، وقد خطر على بالها أكثر من مرة أن تنهض وأن تطرق باب نوم أمها ، ولكنها كانت تشفق على أبيها فما كانت تحب أن تقلق راحته . واشتد بها الوجع فنهضت وهي تضع يدها في وسطها كأنما تمسك شيئا خشية أن يسقط ، وسارت إلى غرفة نوم أمها ورفعت يدها لتدق الباب ولكن خجلها منعها فعادت وهي ترجو أن تستيقظ نبيلة ، إلا أن نبيلة ظلت تجتر أحلامها .

وفى الصباح نهضت زينب وكان أول ما فعلته أن انطلقت إلى حيث أحلام ونبيلة ، فألفت أحلام تتأوه فقالت لها :

(الحفيد)

_ صباح الخير .. نمتى كويس ؟ .

ـــ صباح النور يا ماما ، طول الليل بتأ لم م الوجع .

واستيقظت نبيلة على الحديث الدائر بين أمها وأختها فجلست في الفراش تفرك عينيها ، سمعت أمها تقول لأحلام :

ــ وحاسه بإيه دلوقت ؟

... كأن إيد هون بتدق في ضهرى .

ــ تبقى ح تولدى .

فغادرت نبيلة الفراش وقالت:

_ مستنيين إيه ؟ ما تبعتوا للدكتوره .

و فقالت الأم في ثقة:

ــ لسه بدري يا نبيله . البكريه تطول شويه .

وذهبت نبيلة إلى الحمام فإذا بها تلقى سامى عند الباب وقد وضع فوطة فوق كتفه ، فلم تسرع لتدخل كاكانت تفعل وتغلق الباب خلفها بل تأخرت خطوات وقالت وهي تفسح الطريق أمام أخيها :

ـــ اتفضل .

فالتفت سامي إليها وقال:

ـــ كبرنا وعقلنا .

وما كاد يتم كلامه حتى جاءت سوسن تجرى واندفعت إلى الحمام وأغلقت الباب خلفها ، فإذا سامى يثور ويقول لها مهددا :

ـــ بس لما تطلعی أنا ح اوریکی .

فابتسمت نبيلة فما حدث يذكرها بأيام سعيدة مرت بها . أيام لم تعرف حقيقة قيمتها إلا بعد أن فقدتها . ثم التفتت إلى سامي وقالت له :

ـــ بكره تكبر وتعقل .

ولم تحتمل أحلام الآلام التي كانت تموج في جنباتها ، فغادرت الفراش وأخذت تقطع الشقة جيئة وذهوبا ، حتى إذا لمحت أباها يخرج من غرفته سعت إليه وتعلقت به وهي تقول :

_ ح اولد ازاى با بابا ؟

فقال الرجل وهو يتصنع الهدوء :

ــ ما اعرفش .. دى حكمة ربنا ، اللي اعرفه إنك ح تولدى .

وغادر الرجل البيت ليذهب إلى عمله ، وراحت أحلام تتلــوى وتصرخ فينتاب الفزع نبيلة فلا تجد إلا أن تذهب إلى أمها وتقول لها :

ـــ ما تبعتي تجيبي الدكتوره .

__ لسه يا نبيله .

_ ولو نزل دلوقت ؟

_ ح استلقاه على أديه .

ونظرت إليها نبيلة في ضيق وعيناها تقولان : يا قلبك . واستمرت أحلام تتلوى وقد ارتفع صراخها فقالت نبيلة :

فنزلت الأم على رغبتها وقالت لها :

ـــ ح ابعت لها وروحى انتي سخني الميه .

وراحت زينب إلى حيث كان أولادها وقالت لهم :

ـــ مين فيكو يروح ينده للدكتوره ؟

فصمتوا جميعا .. فقالت زينب :

ـــ اللي يروح فيكو ح ادّيله قرش .

فقال عاطف في حماس:

ـــ أنان

ــ شاطر .. روح قل لها تعالى حالا ، أحلام بتولد .

ـــ هاتى القرش قبله .

فمدت يدها في صدرها وأخرجت منديلا بسطته وأخذت قرشا من بين النقود وأعطته عاطف ، فراح عاطف يهرول هابطا وإذا بالكلب يهبط من السطح ويقتفي أثره .

ودخلت الأم غرفة أحلام وأخذت تعيد تنسيقها وتخرج الثياب والأقمشة التي سيلف فيها المولود ، واشتد صراخ أحلام فقالت لها أمها : _ دى طلقة ولد .

فقالت أحلام متبرمة :

ــ أنا لا عايزه ولد ولا بنت . . عايزه اللى فى بطنى ينزل ويريحنى . وجاءت الدكتورة ودخلت مسرعة ، وسارت إلى حيث كانت أحلام فألفتها تتأ لم وتتلوى ، فنظرت إلى زينب وقالت مستأذنة :

ــ أديها حقنة تحمى الطلق ؟

فقالت زينب وقد لاح في وجهها فزع:

ــ لا ياختى .. أنا ما احبش الحقن .

ودخلت نبيلة عليهم وقالت :

_ جلال جه .

. فصاحت أحلام:

_ هاتوه يولد معايا .

وصل قولها أذني جلال فانكمش ، فجاءه سامي وقال له مداعبا :

ـــ ما تخش تولد معاها ، بس فالح تعملها .

و لم يبتسم جلال .. كان مشفقا على زوجه يتعجل ولادتها لينتهى ما هى فيه من عذاب . وراح يغدو ويروح وقد صار كله آذانا ، إنه يسمع كل همسة في الحجرة ، بلغه قول الدكتورة :

ــ اتفضلي انتي بره بقي .

فراح يرقب الخارج وسمع الأم تقول:

ـــ ناوليها الميه السخنه .. لأ ما تشيليهاش انتى .. خلى سامى واللا مراد يجيبها .

وأسرع جلال إلى المطبخ وعاد يحمل طستا به ماء يغلى ، فإذا بنبيلة تقابله في منتصف الصالة فتقول له :

_ عنك انت .

فيأ بى أن يترك الطست لها فتسير إلى جواره حتى إذا بلغا باب غرفة أحلام قالت :

_ خدى الميه من جلال يا ماما .

وتفتح زينب الباب وتأخد منه الطست وتقول :

_ إيد ما نعدمها .

ويأتي حسين ويري بخار الماء يملأ جو البيت فيقول:

_ هي لسه ما ولدتش ؟!

فيرد عليه جلال:

ــ لسه يا عمى .

ويفطن حسين إلى و جو د جلال فيقول له:

_ إزيك يا جلال .. ما تآخذنيش يا ابني .

ويجول جلال وحسين خلال الشقة وقد لفهما قلق ، و لم يحتمل حسين ذلك فالتفت إلى جلال وقال:

ــ أنا نازل الشارع اتمشى .. تيجى معايا يا جلال ؟

ـــ أنا ح افضل هنا .

ـــ لما تولد ابقوا قولوا لي .

وحرج حسين وأولاده يرقبونه في دهشة فما كانوا بقادرين على أن يعرفوا حقيقة شعوره ، وراح جلال يرصد الساعة التي في الصالة ، إنها تسير ببطء شديد كأنما الزمن قد توقف . واتجهت نبيلة إلى باب الغرفة تتصنت فإذا بسامي يذهب إليها ويقول لها وهو يجذبها من يدها في رفق:

ــ تعالى استريحي .

وارتفع صراخ مولود وإذا بالبشر يكسو جميع الوجوه ، حتى هالة تهللت بالفرح ، ومر وقت ثم خرجت زينب لجلال وقالت لجلال :

_ تتربي في عزك.

ـــ مرسى يا تانت .

وقال سامي في عدم ارتياح :

ــ بنت . . أنا ما احبش البنات .

فقال جلال في استسلام :

ــ كل اللي يجيبه ربنا نعمة .

والتفتت زينب إلى سامي وقالت :

ـــ ربنا مش ح يرزقك إلا بالبنات .

وخرجت الدكتورة وقالت لجلال :

ــ تقدر تتفضل دلوقت .

ودخل جلال وانسل عاطف خارجا في أثر الدكتورة .

نظر جلال إلى زوجه في حب ثم قال :

ـــ حمد الله على سلامتك .

وابتسمت أحلام وقالت له :

ـــ قربهو لی شویه أشوفه .

وظهر فى وجه جلال دهشه ، وقال وهو يميل فوقها ويجذب فراش الطفل ليقربه منها :

ـــ أمال ماما قالت بنت ازاى ؟.

_ خايفه لا يتحسد .

فنظرت إلى الوليد وقد نسيت كل آلامها ، وتحركت أمـومنها فقالت :

_ مش حلو يا جلال ؟

. ونظر إليه جلال فلم ير إلا قطعة لحم أحمر فقال :

__ ح يطلع وحش لمين ؟

ودخل حسين فإذا بأولاده جميعا يدخلون حوله وقد أمسك عاطف بيده كأنما يقول إنه هو الذي استدعاه ، فلما رأى ابنته خفق قلبه في حب وقال في فرح فياض ،

- _ حمداً لله على سلامتك .
 - _ مرسى يا بابا .

وقال له جلال وهو يشير إلى ابنه الذي استقبل الدنيا بالبكاء ثم استسلم لقضائه :

_ شوف حسين الصغير حلو ازاي .

فإذا بابتسامة تتوج جميع الشفاه ، وإذا بالدموع تترقرق في عيني زينب فتنسل لتكفكفها بعيدا . ودخل حسين وزينب محلا فاخرا لشراء هدية للمولود ، واتجها إلى جناح الأطفال فرأى حسين ثوب طفل فأخذه بين يديه يقلبه ثم قدمه إلى زوجه وهو يقول :

_ إيه رأيك في ده ؟

فنحت زينب يده بالثوب بعيدا عنها وقالت:

ـــ الهدوم عنده كتير .

وأعاد حسين الثوب إلى مكانه وتناول عروسة صغيرة وقال لزينب :

ـــ وإيه رأيك فى دى ؟

فقال وهي تجول بعينيها في المكان تبحث عن شيء :

_ ح يعمل بيها إيه ؟ ده لسه ما يفهمش . نجيب له حاجه تنفعه .

وفطن حسين إلى أنها تبحث عن هدية غالية ، فرأى ذلك الشيء المصنوع من جلد أزرق الذى يوضع فيه الطفل ويحمل بعلاقتين فى يد الأب والأم فى أثناء الخروج فرفعه فى يده وقال لزينب :

ـــ أفتكر ده مناسب .

فقالت زينب وهي تقلب عينيها في المكان :

<u>ــ قربت</u> .

ووقعت عيناها على بغيتها ؛ إنها عربة صغيرة لها كبود فخم يفتح ويغلق يوضع فيها الطفل وتدفع باليدين تصلح للشتاء والصيف ، فانجذبت إليها وسارت وحسين يتبعها حتى إذا ما قبضت على يدها المصنوعة من معدن لامع ودفعتها إلى الأمام وجذبتها إلى الخلف تختبر متانتها قالت :

ــ هي دي .

ونظر حسين إلى الصندوق المصنوع من الجلد الأزرق وقال:

ــ وماله ده ؟

ــ دا ما يستعملش إلا والنونو صغير ، تو ما كبر مبقاش له قيمه ، إنمادى ممكن تتحط جنب سريرها وتبقى له سرير . . يعنى كلها فوايد . ولما كان حسين قد تعلم أن لا فائدة من الاعتراض استسلم ، وقالت زينب للرجل الذي كان في خدمتهما :

- _ ممكن تبعتوها ع البيت ؟
 - ــ بكل ممنونية يا افندم .
- ـــ طب اديله العنوان يا حسين .
 - _ ما ناخدها معانا ؟ .
- ــــ لأ . ح نشترى حاجات تانيه .

وأعطى حسين الرجل العنوان وذهب يدفع الفاتورة وهو يتلفت خشية أن تشترى زوجه شيئا آخر .

وانصرفا إلى الغورية وراحت زينب تشترى المغات والشمع فأتت على الشمع الذى كان موجودا بالمحل ، ثم انتقلت إلى محل آخر واشترت كل ما فيه من شمع وقالت للرجل :

ـــ ما تعرفش نشتري فول مقشر وحمص منين ؟

ــ فيه مقله هناك حاجاتها كويسه .

وسارت تشق طريقها فى زحام الغورية وحسين يحمل ما اشترته ، وعلى الرغم من الزحام راحت تحدثه وتقول :

ـــفين أيامنا الحلوه .. أيام الفستق والبندق واللوز ؟ مين كان يصدق إن ح تيجى علينا أيام نفرق فيها سودانى وحمص وأرواح فى السبوع .. زمن !!

وذهبا إلى المقلى واشترت زينب ما شاءت وحسين واقف متبرم ، حتى إذا ما حملت ما اشترت قالت له :

ــ السوداني بقي أغلى ما كنا بنشتري الفسدق !

وصمت حسين ثم قال:

ـــ تعالى نشوف تاكس .

ـــ لسه .

_ لسه إيه كان ؟

_ ما اشتريناش الفراخ .

ـــ يعنى ضرورى النهارده .

ــ يا نهارى ، أمال أحلام تتنفس بإيه ؟ دى الوالده أول ما تنزل العيل

لازم تحط فرخه تسند بيها بطنها .

فقال حسين ساخرا:

ـــ والفراخ دى مش عايزه تلاجه ؟ ما تيجى نشترى تلاجه قبله ؟ و لم يعجبها سخريته فقالت في عتاب :

_ هو آنا عقلی طاقق لأد كده ؟ التلاجه عند جلال ندبح الفراخ و نضفهم و نوديهم عنده ، وكل يوم وهو جاى يجيب فرخه معاه .

ــ وإيه لازمة البعتره دي كلها ؟

ـــ خلينا نشرب ونفرح وجيراننا يشربوا ويفرحوا . مش ده أحسن ماكانت المستشفى تلهف الفلوس ؟

وأطرق حسين لحظة ثم قال :

ـــ ما نشتري فراخ م الجمعيه ولا تعب ولا تنضيف.

ولوت زينب شفتها وقالت :

_ هى دى فيها بر ، دى شربتها زى مية الفول النابت .. البلدى بلدى .

وسار معها مستسلما إلى الفرارجي ، فراحت تحمل الدجاج تزنه في يدها قبل أن تسمح بوضعه في الميزان . واشترت خمسة أزواج وحسين ينظر صامتا ثم قال :

- _ ما يدبحهم وينضفهم .
- _ أنا اللي حادبحهم في البيت بإيدى .
 - ــ وح ناخدهم ازاى ؟

_ حد يحطهم في قفص ويبجي معانا .

هذا ما كان فى حسبانها : إنها تريد أن تعود محملة وأن يسير خلفها من يحمل قفص الدجاج وأن يتحدث الجيران بما جلبت لابنتها . وقبل أن تتحرك للانصرف قالت لحسين :

- _ نسينا السمن ، أمال ح نعمل المغات بإيه ؟
- ـــ ومين ح يشيله واحنا محملين زي الحمير ؟
- ــ اللي يشيل قفص الفراخ على راسه ياحد السمن في إيده .

وانطلقت إلى بقال وحسين يتحكم فى عواطفه وإن كان سينفجر من الغيظ . واشترت صفيحة سمن صغيرة وناولتها للرجل الذى كان يحمل قفص الدجاج فوق رأسه ، فالتقطها فى يده وسرى الركب فى الطرقات وقد وسعت زينب من خطوها فهى تريد أن تصل إلى البيت قبل سقوط الليل .

ولمحت سيارة المحل الذى اشترت منه عربة المولود واقفة أمام دارهم فاستشعرت زهوا ، وسمعت صوت الكلاكس المتصل فإذا بسعادة تغمرها ، فالكلاكس سيجذب الجيران إلى الشبابيك والشرفات وهذا غاية أمانيها ليروا ما جلبت من طيبات ..

وفتحت النوافذ والشرفات ، وخرج سامى ومسراد والأولاد إلى الشرفة ، فلما رأوا والديهم قادمين هرعوا هابطين في الدرج مسرعين ، وجرى سامى ليحمل عن أبيه ماكان ينوء به ولكن أمه قالت بصوت عال لا لتسمعه وحده بل لتسمع الجيران :

ـــ روح انت يا سامي استلم منهم العربيه .

وكانت العربة قد خرجت من جوف السيارة واستقرت على الأرض فذهب سامى ليتسلمها . وحمل مراد وعاطف وسوسن ما كان يحمله أبوهم والتفوا حول أبويهم فرحين ، فسارت زينب تكاد أعضاؤها تهتز سرورا ، وبين وقت وآخر تلتفت إلى الرجل الذي يحمل قفص الدجاج ويسير حلفهم كأنما كانت تعلن للملأ أن الدجاج دجاجها .

ذبحت زينب الدجاج ووضعت صفيحة ماء على وابور الجاز وذهبت قدم لأحلام العشاء ، فوجدت أن هالة قد وضعت في العربة وأن موسن وعاطف يتشاجران على من يدفعها أمامه فصاحت فيهم :

__ إيه المسخره دى ؟ هي دى كان لعبه .

وأنزلت هالة ، فلما وجدتها ستبكى قالت لها :

... تعالى نضفي الفراخ معايا .

فقال عاطف:

ـــ وانا .

ــ وانت .

وقالت سوسن :

ـــ وانا كان .

ـــ وانتى كمان .

ودفعت العربة أمامها ووضعتها إلى جوار سرير أحلام وقالت لها :

_ استعمليها بالليل .

ووضعت صينية الطعام في حجر أحلام ، ومالت على الطفل تقبله في

حب ثم خرجت وهي تنادي :

__ سامی ، مراد ، نبیله ، سوسن ، عاطف . تعالوا کلکم اشتغلوا .

واتجهت إلى المطبخ فإذا بجميع الأولاد يلحقون بها ، فوضعت طستا كبيرا في الوسط وقالت للأولاد :

ــ هاتوا كراسي المطبخ واقعدوا عليها .

فأتوا بها وتحلقوا الطست ، وأنزلت صفيحة الماء المغلى من على الوابور وراحت تغمس الدجاج بها وتلقى به فى الطست ، فيتناول كل واحد من أولادها دجاجة ينتف ريشها .

وجاءت هالة وحاولت أن تلتقط دجاجة وأن تفعل كما يفعل إخوتها فإذا بالدجاجة تلسعها فتبكى فتضمها نبيلة إلى صدرها ، ويأتى حسين ليرى ما الذى أبكاها فتقول زينب له :

_ ما تقعد معانا تساعدنا .

فجلس بعد أن أفسح له سامى مكانا وراح ينتف ريش دجاجة ، فامتلأ المكان بالريش .

وقال عاطف وهو يجاهد لينزع ريش جناح الدجاجة التـــى كان ينظفها :

ـــ اليومين دول سوزى ح يهيص .

فقال له مراد:

_ ده احنا اللي ح نهيص .

وانسحبت هالة ونامت فى الصالة ، وبعدها انسحب عاطف ، وأرادت نبيلة أن تنسحب فقد مشى التعب فى أوصالها فقالت وهى تنهض :

ـــ أما اشوف الأولاد ناموا فين .

وذهبت إلى حيث كانت هالة وعاطف فأ يقظتهما فى رفق وقادتهما إلى سرير أبويها ، و لم تعد لتستأنف عملها بل تمددت إلى جوارهما ، ولولا خجلها لدخلت لتنام فى سريرها . وسرعان ما انسحب سامى ثم مراد ، فلما دقت الساعة الثانية عشرة لم يكن فى المطبخ سوى حسين وزينب وسوسن .

ووضعت زينب الدجاج في مصفاة كبيرة وقالت :

ــ الصبح نخلي جلال ياخدهم ويحطهم في التلاجه .

فدنت سوسن من أمها وقالت لها :

_ عايزه كبده .

لم تكن سوسن تنتظر بلا هدف بل كانت تريد أن تأكل أكباد الدجاج ، وقد صادفت الفكرة هوى فى نفس الأم فراحت تحمر أكباد الدجاج ثم أخذت تأكل مع سوسن و تغرى حسين على مشاركتهما فيه ؟ و لم يستطع مقاومة إغراء الروائح التي ملأت أنفسه ، فأقبل يأكل متلذذا حتى كاد ينسى النوم الذى كان يداعب عينيه .

وبعد أن أكلا لمحا نبيلة تنسحب إلى غرفتها ، فقالت لها أمها بعد أن فطنت إلى أنها لم تدعها على الطعام :

(الحفيد)

ـــ تعالى يا نبيلة حمرى لك حتتين وكلي .

فقالت نبيلة وإن أسالت الرائحة المنبعثة من المطبخ لعابها:

__ أنا اتعشيت يا ماما مع سامي ومراد .

ودخل الجميع ليناموا ، فوجدت نبيلة أحتها أحلام ترضع وليدها فقالت وهي تبتسم :

_ هربتي من الجامعه عشان ما تسهريش ، أهو سهرك .

فقالت أحلام في رضا:

__ بس ده سهر لذید .

وفى الصباح الباكر نهضت زينب تقدح السمن للمغات فإذا بالشقة كلها تعبق برائحة السمن المقدوح ، وهرعت نبيلة إلى المطبخ تعاون أمها قالت :

_ أساعدك في حاجه ؟

__ حمصى الفول السوداني .. قال فول سوداني قسال .. فين المكسرات ؟ هو المغات يبقى مغات إلا لما يبقى السمن فوق وشه قيراطين ويتملى بالمكسرات .

واستيقظ كل من في البيت فنادت على سوسن وقالت لها:

ـــ حدى سلطانية المغات دى إديها لام محمد جارتنا ، وقولى لها حلى الأولاد ييجو في السبوع .

وخرجت سوسن تحمل السلطانية ، ونادت زينب على عاطف وقالت له : ـــ ودى المغات ده لخالتك أم اسماعين وقول لها حلى الأولاد ييجوا في السبوع .

ونادت مراد وأرادت أن تحمله حلة مغات ليذهب بها إلى الجيران فأبي وقال لها:

ـــ إدى عاطف قرش وهو يوزع لك المغات ع الجيران كلها . والتفتت نبيلة إلى أمها وقالت :

_ إنتى ح تفرق مغاتع الجيران كلهم ؟ ح تكفى عليهم منين ؟ _ خير ربنا كتير .

وتناولت فنجانا كبيرا ملأته مغاتا ورشت فوقه السودانى المطحون وذهبت إلى حسين وقدمته إليه ، واعتذر حسين بأنه لا يستطيع أن يشرب على الريق كل ذلك الدسم ، قالت له :

۔ اشرب یا حسین انت ح تعمل زی الجیل الخرع دہ ، دانا ابویا اللہ یر حمه ما کانش یفطر إلا بطاجن سمك .

وتناول حسين الفنجان كارها وراح يشرب قبل أن يحلق ذقنه .

وجاء سامى وهو يحمل صحف الصباح وهو يقرأ فيها فناول أباه صحيفة وأخذ أخرى يتصفحها ، فأقبلت سوسن ودخلت على أبيها تروى له ما فعلته فهى لاترى شيئا ولا تفعل شيئا إلا وتحكى عنه لا تقدر على الكتمان ، قالت :

ــــ وديت المغات لام محمد وعم محمود وست زهيره وست فردوس ولكل الجيران اللي في بيتنا وقلت لهم خلوا الأولاد ييجوا في السبوع .

_ وديتي لکل دول ؟

_ آه ، وعاطف و دا للجيران اللي قدامنا واللي جنبنا .

ونحى حسين الفنجان جانبا وذهب إلى حيث كانت زينب . إنها كانت في طريقها إلى أحلام تحمل لها الإفطار فقال لها في غضب :

- ـــ انتى ناويه تعملي إيه يا زينب ؟
- _ سبوع ، انت في ديك الساعة اللي بقيت فيها جد .

ووقف يتلفت في حيرة وغابت زينب في غرفة بنتها .

ودق جرس الباب فراح حسين يفتح فإذا مصطفى علوان وزوجه قد أقبلوا ليروا حفيدهم ، فما أن رأى مصطفى حسينا في جلبابه حتى قال له :

- _ لا مؤاخذه ، النهارده الجمعه وجينا بدري .
 - _ البيت بيتكم اتفضلوا .

ودخلاوفى يدأم جلال صندوق شيكولاتة ، وبلغت الأصوات أذنى زينب فخرجت ترحب بهما وتبادلت المرأتان القبلات ، ثم قالت أم جلال :

_ مبروك ما جالكو .

فقالت زينب وقد أشرق وجهها سرورا .

_ مبروك ما جالنا كلنا .

ودخل الجميع غرفة أحلام فوضعت أم جلال صندوق الشيكولاته قريبا من امرأة ابنها بحيث تراه ، ثم مالت عليها وهي تقول :

_ ألف حمد الله على سلامتك .

وقبلتها ، وقال مصطفى علوان :

ـــ مبروك ايتربى في عزكم .

وجلس وجلست زوجه ، وذهبت زينب وحملت الوليد ودفعته إلى جدته وهي تقول :

_ شوفی حسین حلو ازای ؟

وتعكر صفوها لما صك أذنيها اسمه ، ولكنها تناولته على كفيها وهى تقول :

ـــ بسم الله الرحمن الرحيم ..

وتطلعت في وجهه ثم التفتت إلى أحلام وقالت:

ــ منين جبتي الوحاشه دي ؟ أبوه حلو وانتي حلوه .

فقالت أحلام:

ودفعته أم جلال فى رفق إلى زوجها فراح مصطفى ينظر إليه وقد تحركت عواطفه فإذا بإشراقة كبيرة تكسو وجهه . وأحرج من جيبه ورقة من فئة الخمسة الجنيهات ووضعها على صدره .. قدم الطفل إلى حسين الذى كان يرقب ما يجرى منفعلا فهو لا يصدق أنه أصبح جدا ، ولما رأى يدى مصطفى ممدودتين بالطفل قال وهو يتقهقر إشفاقا :

_ لاً لا . أنا ما حبش أشيلهم وهم صغيرين كده .

وتناولت زينب الطفل وأعادته في خفة إلى جوار أمه ، فقال حسين

وهو يرنو إليه :

ــ سبحان الله ! بقى ده يكبر ويمشى ويبقى راجل ! فقال مصطفى فى فرح :



ـــ ويجوز ويخلف ويبقى جد .

وانتهت الزيارة فخرج حسين وزينب خلفهما يودعانهما ، وقبل أن ينصرفا قالت زينب :

ـــ ما تتأخروش عن السبوع . فقال مصطفى فى صدق :

_ هو احنا بقينا نقدرَ .

وأغلق الباب خلفهما ، فراح حسين ينظر إلى زوجته في عتاب ويقول لها :

__ إيه اللي بتعمليه ده ؟

ـــ كان مش عايز جده وتيته يحضروا السبوع ؟!

وهبت أم جلال وزوجها وهي تتلهف على الابتعاد ، فلما وصلا إلى الطريق قالت :

__ شوف ابنك الخايب ، سمى ابنه على اسم حماه ، كان الأصول يسميه مصطفى ، ده حتى اسم مصطفى جلال لايق اكتر من اسم حسين جلال !

ولزم مصطفى الصمت ، كان لا يحب أن يثير موضوعا للنقاش لا طائل تحته ، وضايقها صمته فأرادت أن تحرك لسانه قالت :

_ ح تيجي السبوع ٢

__ودی فیها کلام ؟ سموه حسین جلال سموه مصطفی جلال آنا قلبی اتفتح له .

19

وضع الفول والحمص كوما فى وسط المائدة ، وذهبت زيسنب وسرعان ما عادت بصندوق الشيكولاتة الذى جاءت به أم جلال وصبت ما فيه فوق الفول والحمص وراحت تقلب الكوم بيدها ، وجلس أبناؤها جميعا حول المائدة ولم يغب منهم أحد ، حتى الكلب سوزى كان يمرح حولهم .

كانوا قد قطعوا ورق السوليفان مربعات صغيرة ليلفوا الفول والحمص والشيكولاتة التي ستوزع على الصغار في « السبوع » وقالت الأم:

_ ما فيش أكتر من حتة شيكولاتة واحده فى كل لفه .

فقالت نبيلة وهي تلف ورقة وتربطها بخيط:

_ الشيكولاتة مش ح تكفي .

فقالت زينب في إيمان:

ـــ دلوقت ربنا يرزق .

ورن الجرس فتركت سوسن ما في يدها وجرت لتفتح ، وسرعان ما جاء صوتها معلنا عن القادم :

__ تانت جيهان .

وقامت زينب تستقبلها فتهللت بالفرح فقد رأت في يدها صندوق شيكولاتة ، فاندفعت إليها تضمها إلى صدرها وتقبلها وتقول :

_ ليه التعب ده ؟

__ ما فیش تعب ولا حاجه .. دا سامی قال لی امبارح قلت آجی آبارك لكم .

وتقدمت نبيلة تصافحها ولكنها رأت أن تقبلها ، فأمها قد فعلت ذلك ولا يليق أن تكون التحية بين الشباب أقل حرارة من تحية الشيوخ للشباب .

و دخلت جيهان غرفة أحلام وإذا بسامى يقبل وقد خلع البيجاما وارتدى القميص والبنطلون . وجد أن ذلك أليق . ولما لمح جيهان تضع صندوق الشيكو لاتة حيث وضعت أم جلال الصندوق الذى أتت به أراد أن يطمئنها إلى أنهم شاهدوه قال :

ـــ متشكرين .

وأسرعت زينب تعد لها فنجان مغات يليق بالهدية التي حملتها ، وسرعان ما عادت به وقدمته إلى جيهان وهي تقول :

__ اتفضلي عقبال ما نشرب الشربات يوم فرحك والمغات يـوم عوضك .

وتناولت الفنجان في خجل ورشفت منه رشفة قرأ سامي بعدها في وجهها عدم رضا فقال :

_ بلاش إذا كنتي ما بتحبيش . نجيب لك حاجه تانيه ؟

ــ أبدا ، ده لذيذ ، بس سخن .

وكانت زينب قد استاءت من قول ابنها ، فلما أبدت جيهان رضاها عنه قالت :

_ يا خسارة يا سامي ماليش بخت معاكم .

وأرادت نبيلة أن تغير الموضوع فقالت لجيهان :

__ خطيبك اتخرج ؟

_ أيوه .

فقالت أحلام:

ـــ وح تتجوزوا امتى ؟

_ أول ما تلاقي شقه فاضيه .

فقالت نبيلة:

__ ربنا یهون ، لولا جوزی کان فی بیتهم شقه فاضیه کنا زماننا مخطوبین لغایة النهارده .

ولاحظ سامى وأحلام أن هذه أول مرة تذكر فيها زوجها فتبادلا النظرات ، ولم تر زينب فى ذلك ما يدعو إلى الملاحظة أو الاستغراب فقالت لتجامل جيهان :

ــ ح تفرج ، الحكومه قالت ح تبني شقق للعرسان .

فقال سامي بسخرية:

ــ قالت .

وسألت نبيلة جيهان :

ـــ وناويه تكملي بعد الجواز ؟

__ طبعا .

وقالت أحلام :

ـــ واتفقتوا إنكم ما تخلفوشي إلا بعد ما تخلصي الجامعه ؟

ـــ طبعا .

فالتفتت أحلام إلى نبيلة وقالت :

_ كلهم بيتفقوا في الأول على كده وبعدين يفهموا.

وقالت نبيلة مؤيدة أختها :

ــ ما فيش ست يا جيهان تستحمل تضيع شبابها من غير ما تخلف . فقالت جيهان في تحد :

__ أنا .

فقالت نبيلة في استسلام:

_ كلنا قلنا كده .

وكانت زينب تتململ في جلستها . لم تكن ضيقة بالحديث الدائر ولكنها كانت تتلهف على أخذ الشيكولاتة التي جاءت بها جيهان لتصبها فوق كوم الفول والحمص وتخلطها به . وجاءت سوسن وقالت :

ـــ انتوح تقعدوا هنا على طول ؟ أمال مين اللي ح يلف الشيكولاته ؟ ونهر ها سامي قائلا:

ـــ امشى دلوقت .

وارتاحت زينب لما فعلته ابنتها فنهضت وقالت :

ـــ جیهان مش غریبه تیجی تشتغل معانا ، نتعب لها فی یوم فرحها . فقالت جیهان و هی تنهض دون أن تدری ماذا ستفعل :

_ قوى يا تانت .

وساروا إلى غرفة الطعام ، وتذكرت زينب شيئا فعادت وأخذت علبة الشيكولاتة واتجهت بها إلى حيث ذهبوا .

ورأت جيهان كوم الفول والحمص والشيكولاتة ، ورأت مسراد وسوسن منهمكين في لف ورق السوليفان ففطنت إلى ما ستفعلسه فجلست . وأقبلت زينب وقد صبت الشيكولاتة فوق الفول السوداني والحمص وراحت تقلبه ، ورماها عاطف بنظرة متسائلة وقال :

ــ منين يا ماما جبتي الشيكولاته دى ؟

فلكزته من تحت المنضدة وكانت كل قسماتها تصرخ فيه: اسكت. وجلست جيهان وجلس سامى قبالتها وراحوا جميعا يعدون لفافات الهدايا التى ستوزع على الصغار والكبار فى « السبوع ». وراحت هالة تحاول أن تبعثر ما تصل إليه يدها وأمها تحجزها.

وغافل عاطف أمه وسرق قطعة شيكولاتة وقشرها وناولها للكلب ، ولمحته سوسن فقالت :

ــ ماما الحقى . عاطف بيأكل الكلب شيكولاته .

فقال عاطف متبجحا بعد أن انكشف أمره:

ــ هو يعني اللي ح يكلوها أحسن منه ؟

وأرادت زينب أن تعلن عن كرمها وسماحتها فقالت :

ده روح یا سوسن یاکل کل اللی نفسه فیه ، یستاهل کل خیر ، ده من یوم ما دخل بیتنا جانا الفرح کله والخیر کله .

و لم يعجب ذلك الكلام عاطف فقال:

_ أمال رمياه رمية الكلاب في السطح ليه ؟

وضعت قلة فيها شمعة كبيرة مضاءة طوال ليلة « السبوع » في غرفة نوم أحلام وابنها ، فالشمعة المضيئة لتكون كل أيام المولود أنوارا . والقلة ليشرب في الصباح رجل حكيم وآخر طويل العمر وثالث هادئ النفس ، ليشب الوليد حكيما طويل العمر هادئ الطبع .

واستيقظ الجميع مبكرين تأهبا « للسبوع » ، فلما وقعت عينا زينب على حسين قالت له :

_ تعال اشرب من القله .

فسخر منها فإذا بها تقول له :

_ ما فيش حد هنا نفسه أهدا من نفسك .

و لم يستطع أن يتملص منها فقد قادته فى خفة ودلال إلى حيث ترقد ابنته ، ورفعت الشمعة من القلة ثم قدمت له القلة وهى تقول :

ــــــ أشرب ، دى ميه بزهر .

ورفع حسين القلة وشرب ، وكان سامى ومراد ونبيلة وسوسن وعاطف قد جاءوا يشاهدون أباهم وهو يشرب ، فلما أعاد القلة إلى مكانها مد سامى يده إليها ليرفعها فإذا بأمه تقول له :

_ سيب القله يا سامي .

ونظر سامي في إنكار إلى أمه فقالت نبيلة :

ــ انت عايزه يطلع غيار زيك .

فقال سامي في إنكار:

__ بقى أنا غيار ؟

ـــ ده انت تغير من هدومك .. ورتنى الويل من غيرتك .

وقال مراد :

_ أشرب أنا ؟

فقالت أحلام لتشارك في اللعبة:

ــ عشان يطلع مطيور زيك .

ــــ الله بسامحك .

وقالت سوسن :

ــ طب هاتوا أشرب انا .

فقال مراد :

ـــ عشان يطلع فتان زيك . كل حاجه يجرى ويقول الحقى يا ماما .. الحقى يا ماما .

وصمت عاطف لم يشأ أن يتعرض لألسنتهم الحداد ، وجاءت هالة فإذا بأحلام تقول :

ـــ والنبي تسقيها يا ماما م القله .

فقالت زينب:

_ لاً . ما حدش ح يشرب منها إلا حماكي لما ييجي .

فقال سامي:

_ واشمعنی حماها یعنی ؟

__ عشان ياخد منه طول العمر .

فقال مراد .

_ ووسعان الكرش.

وابتسموا جميعا ، و إيشاً الأب أن يقال إنه سكت على هذه الله .. خرية فقال:



_ عيب يا ولد .

وقالت أحلام:

ــ لما ييجي جلال . خلوه يشرب م القله .

فقال سامى:

_ واشمعنی جلال ؟

فقالت أحلام:

_ عاقل ورزين ، يطلع ابنه زيه .

وجاء جلال وأبواه فإذا بزينب تقودهم إلى غرفة أحلام ، فما أن انتهوا من السلام والتحية حتى قدمت زينب إلى مصطفى علوان القلة وهى تقول له :

__ اتفضل اشرب.

ـــ أنا مش عطشان ، كتر خيرك .

_ لأ ده عشان ياخد .. ياخد طبعك الحلو .

فقالت أم جلال:

ـــ هو كده ؟ طب هاتوا أشرب بقى .

وناول مصطفى زوجته القلة بعد أن شرب منها ، فلما رفعتها لتشرب تبادل حسين وزينب وأو لادهما نظرات استياء . وكأنما أرادت زينب أن

تمحو أثر شربة حماة ابنتها فقالت وهي تدفع بالقلة إلى زوج ابنتها :

. ــ خد اشرب یا جلال .

فقال وهو يرنو إلى زوجته في حب :

(الحفيد)

_ إذا كان ولا بد تشرب أحلام ، ياريت ياخد طبعها الحلو .

وكانمأ ضايق ذلك القول أمه فقالت :

ـــ طبعا ، قالوا لجحا تحب مين في العيله ، قال اللي بتنام في حضني كل ليله .

وتقاطر الجيران نساء وفتيات وأطفالا وغصت الشقة بهم حتى لم يعد هناك موضع لقدم ، وجاءت نبيلة إلى أمها وقالت :

_ أوزع عليهم دلوقت الملبس والشمع ؟

ولمحت زينب جيهان بين الوافدات فقالت لها:

ـــ ما تتعبيش نفسك ، خلى سامى ومراد وجيهان يفرقوا الملبس والشمع ..

وراح سامى ومراد يوزعان لفافات الفول السوداني والحمص وقطع الشيكولاتة ، وأخذت جيهان توزع الشمع ، فلما أعطت سوسن شمعة أبت أن تتناولها وقالت :

ـــ أنا عايزه شمعه كبيره من اللي مخبياهم ماما تحت السرير .

وسمعتها نبيلة فأخذتها بعيدا وهمست فى أذنها أنها ستأخذ ما تريد بعد أن ينصرف المدعوون .

ودخلت زينب غرفة أحلام وراحت تدق بالهاون بالقرب من أذن الوليد وهي تقول:

ــ اسمع كلام امك .. اسمك كلام ابوك .

فقالت أم جلال منتقدة :

__ الكلام ده ما بطل يا ست زينب .

فقالت زينب وهي مستمرة في دق الهاون .

_ لأ يا اختى ، أنا ما دقتش لهاله عشان كده بتنفرع وتتفزز من أى صوت .

و لم تكتف زينب بدق الهاون بل أتت بغربال وضعت فيه شيكولاتة وقوالب سكر ثم وضعت المولود في الغربال وجعلت تغربله في حنان . وخرجت به إلى حيث المدعوون مكدسين فقالت أم جلال :

__ وإيه لازمة الشيكولاته والسكر ؟

فقالت زينب:

_ عشان أيامه كلها تبقى حلوه .

ثم حملته ونحت الغربال بعيدا وقالت :

_ ولعوا الشمع .. تعالى يا أحلام .

وإذا بأعواد الكبريت تتوهج وإذا بالشموع تضاء وتسرع نبيلة لتطفئ الأنوار الكهربائية . وجاءت أحلام وحملت ابنها لتسير في موكب النور فكان مشهدا يهز الأفعدة . ولاح التأثر في وجوه حسين ومصطفى علوان وجلال . و لم يكتم مصطفى عواطفه فقال في تأثر عميق :

_ الرجلين الحمر تطول العمر .

وارتفعت أصوات النساء والفتيات والأطفال:

حلاقــــاتك برجـــالاتك حلقـه دهب فى ودانــاتك وسارت أحلام تحمل الوليدومن خلفها أمها وحماتها وأختها ، وبعض

النسوة والفتيات والأطفال يتدافعون حولهن وينشدون :

يارب يا ربنا تكبر وتبقى قدنا وتقيد الشمعه زينا .

ووصل الموكب الصاخب إلى باب الشقة وحسين ومصطفى وجلال يرقبون الأحداث في انفعال شديد ، وما أن هب الهواء من الباب المفتوح حتى أخذت زينب المولود من ابنتها وقالت لها :

_ ارجعي انتي ، إنتي طريه .

وخافت أحلام على ابنها فقالت لأمها:

_ الدنيا برد عليه .

_ ما تخفیشی . أنا مكلفتاه قوى .

ولم يطمئن قلب الأم فقالت وهي مشفقة على وليدها:

ــ يعنى لازم يوصل لغاية الشارع ؟

فقالت زينب:

_ ده راجل ، هو ح يفضل قاعد في البيت .

وعادت أحلام إلى غرفتها وهي ترتجف حوفا على ابنها ، ولولا حجلها خطفته منهن وضمته في حنان إلى صدرها .

وهبطت زينب الدرج وهى تحمل حفيدها والنسوة والفتيات والأطفال ينشدون ودوت الزغاريد ، وراح الكلب ينبح من السطح دون أن يأبه له أحد .

وتدافع الأطفال في السلم وهم يحملون الشموع ، وخرج حسين ومصطفى وجلال ينظرون ؛ كانت وجوههم تترقرق بالبهجسة

والانشراح . ولما وصل الجميع إلى باب البيت انصرف بعضهم وعاد البعض حلف زينب وأم جلال ونبيلة .

وانفض الحفل فلم يبق فى الشقة إلا أبناء حسين ومصطفى وزوجته وجلال ، وقالت أم جلال :

ــ نستأذن بقى .

فقالت زينب وهي تدفعها في رفق لتجلس:

_ لا والنبي .. لما ناكل لقمه سوا .

فقالت أم جلال:

... معلهش اعفينا النهارده .. يوم تاني .

وضايق مصطفى علوان إصرار زوجته على الانصراف قبل أن يتناولوا عشاءهم فقال:

ـــ الست حلفت ، انتى عايزه تنزلى حلفانها الأرض ؟!

__ مش لاقيه المريله يا ماما .

صاحت سوسن وهي تدور في غرف الشقة ثم قالت :

_ أنا عارفه الأجازه خلصت بدري ليه ؟

فقال عاطف وهو يبحث عن فردة الجورب تحت السرير:

ـــ ما هي الأيام الحلوه دايما عمرها قصير .

وعثر على الجورب فدس رجله فيه ولبس الحداء ، وجعل يتلفت منقبا ثم قال :

_ فين كراسة الحساب ؟ بقى يوم ما اخلص الواجب ما القهاش ! و لم يعثر عليها فاشتد ضيقه ، وكاد الغيظ يخنقه فقال :

ـــآنا عارف مين اللي اخترع المدارس ؟ ما كانش مات قبل ما يخترعها ويريحنا .

فقال مراد وهو يرشف كوب الشاى :

ــ دى المدارس حتخليك يني آدم .

و لم يعجب ذلك الكلام عاطف فة الى له :

ـــ يعنى اللي ما دخلوش مدارس ميني آدمين ؟ أمال ملوك زمان

ازای بقوا ملوك وهم ما دخلوش مدارس .

ووقفت زينب تصغى إلى ذلك الحوار وفى يديها صينية عليها أكواب الشاى ، فلما رآها مراد قال ساخرا من أخيه :

ـــ تعرفی یا ماما إن ما كنتوش ودیتوا عاطف المدارس كان بقی ملك .

فجاءت سوسن وقد عثرت على مريلتها وسمعت طرفا من الحوار فقالت لأمها:

__ يعنى إيه ملك يا ماما ؟

فقالت الأم وهي تضع لهم صينيه الشاي:

ـــ اشربوا بلاش غلبه عشان تفطروا وتروحوا مدارسكم قبل ما تتأخروا .

وتناول عاطف كوب الشاي بعد أن رشف منه رشفة وقال:

_ ما عندكيش بسكوت يا ماما ؟

فقالت في تأنيب:

__ اللي ما في الشقة لقمه .. خد من بابا خمسه صاغ وروح اشترى لنا عيش .

فقال مراد:

ـــ خد عشره صاغ وهات بخمسه عيش وبخمسه طعميه .

فقال له عاطف:

_ ما تروح انت .

وكان حسين قد خرج من غرفته فقال :

... خد يا مراد العشره صاغ.

وأسقط فى يد مراد فذهب إلى حيث وقف أبوه وتناول العشرة القروش وانصرف ، وجاء سامى بعد أن اغتسل وهو يجفف شعره فقال له أبوه :

- _ انت مش رایح النهارده یا سامی ؟
 - ــ عندى محاضره الساعه حداشر.
 - واقترب سامي من أبيه وقال :
 - _ عايز تلاته جنيه .
 - _ ليه يا سامي ؟
- اشترى الملازم اللي نازله النهارده .

ولما سمع الأولاد ما طلب سامي هرعت سوسن وعاطف إلى أبيهما وقالت سوسن :

- ـــ الناظرة قالت لنا كل واحده تجيب جنيه .
 - ــ ليه ؟
 - _ مساهمة في نشاط المدرسه .
 - وقال عاطف :
 - ـــ وانا برضه قالوا لى هات جنيه .
- وعاد مراد يحمل الخبز وقرطاس الطعمية ، فإذا بزينب تنادى :
 - ــ تعالى يا نبيله قبل الطعميه ما تبرد .

ووضع مراد ما حمل على منضدة وقال :

ــ اعملي لي سندويتش يا ماما أنا اتأخرت .

وتناول مراد الساندويتش من أمه وهرع نحو الباب . فإذا بأبيه يقول :

... وانت جاى يا مراد هات حسين معاك . . الواد وحشنا .

وفتح مراد الباب وانصرف ، والتفتت نبيلة ـــ التي جاءت وقد انتفخ بطنها ـــ إلى أمها وقالت :

ـــ بابا اتعلق بابن أحلام .

ــ يا بنتي قالوا في الأمثال : أحب الولد ولد الولد .

وخرج عاطف وتبعته سوسن ، وجلست الأم مجاملة لابنتها نبيلة فما كانت لتأكل إلا بعد أن يأكلوا جميعا ، ونادت على زوجها وابنها قالت :

__ حسين .. سامي .. تعالوا كلوا لكم لقمه .

وأقبل حسين وسامي يشاركانهما الطعام ، فقالت زينب :

ـــ تاكلوا إيه النهارده ؟

فقال حسين:

ــــ اللي تعملوه ..

فقالت زينب .

ـــ ما تدوخونيش كل يوم .. قولوا تكلوا إيه ؟

فقال سامى:

ــــ بسله ورز .

__ النهادره الاتنين ما فيش لحمه ، رأيكو تحدقوا النهارده تاكلوا كشرى .

فقال سامى:

_ لما انتى ناويه تأكلينا كشرى بتسألينا ليه ؟

كان ذلك شأنها تسألهم عما يريدون أن يأكلوا ثم تصنع لهم ما يحلو لها .

وانصرف الأب ثم سامي و لم يبق في البيت غير زينب ونبيلة وهالة ، فقالت نبيلة لأمها :

_ خشى انت استريحي النهارده وانا اعمل الكشري .

فقالت زينب:

ـــــــ أستريح من أيه ؟

ــــ من دوشتهم .

__والله البيت من غيرهم ماله طعم ، مش عارفه ح اعمل إيه لما يكبروا ويتجوزوا ويصفصف علينا البيت أنا وابوكي .

وشردت زينب مفكرة ، ولاحظت نبيلة مسحة من الأسى تكسو وجه أمها فقالت لها :

_ ما تفكريش في الحكايه دى لسه بدرى .

_ الأيام بتجرى يا نبيلة ، أنا ولدتك من عشرين سنه فاتوا زى ما يكونوا يومين . فاكره لما كنتي زى سوسن ؟ أدى انتى اتجوزتى وكلها

جمعه واللا اتنين وح تبقى أم .

وشردت نبيلة ولاحظت زينب سهومها فقالت لها:

_ الدنيا على كده .. ما تفكريش .

ودخلت الأم المطبخ وتبعتها نبيله ، وإذا بهالة تسير خلفهما تتعثر فى أرجلهما . وبعد الظهر عاد الأولاد إلى البيت وقفل حسين راجعا وكان أول ما قاله :

__ هو مراد جه ؟

فقالت زينب:

. a.u.l ___

_ يبقى راح يجيب حسين .

وقبل أن يلتفوا حول الكشرى دق جرس الباب فصاحت سوسن :

ـــ مراد جه .

وهرولت إلى الباب وفتحته ثم صاحت في فرح :

__ جاب حسين معاه .

وقام حسين ليستقبل حفيده ونبيلة ترقبه في عطف ، فلما وصل إلى حيث كان مراد سمع سوسن تقول متوسلة :

ـــ أنا أشيله .. أشيله والنبي .

و حمل حسين حفيده وراح يداعبه .

فإذا بزينب وأبنائها جميعا يهرعون لمداعبة الطفل ، وارتفعت الأصوات :

_ أنا أشيله .. أنا أشيله .

فالتفتت إليهم زينب وقالت:

_ اشمعنی ده حلی ، ما کلکم بتهربوا من شیل هاله .

وأراد حسين أن يرضيهم جميعا فوضع الطفل على الأرض ، فإذا بهم يركعون على ركبهم وأيديهم حتى حسين وزينب فعلا ذلك وراح كل منهم يحاول بحركات وجهه وإخراج لسانه وتلعيب حاجبيه أن يلفت نظر الطفل إليه . ورأى عاطف أن عقد الأسرة لا بد أن يكتمل فأسرع إلى السطح وأحضر الكلب ووضعه معهم فى الحلقة التى ضربت حول حسين الصغير .

و مر بعض الوقت وجاء جلال وقال:

ـــ فين سونه ؟

فقالت زينب:

__ جوه مع جده .

... أحلام عايزاه لاحسن وحشها .

ودخل وحمل ابنه وانصرف ، وهمرع عاطف وسوسن إلى التلفزيون ، وجاءت جيهان ودخلت تذاكر مع سامى ، وسمع صوت كلاكس سيارة فقال مراد :

ـــ صاحبي جه .. أنا رايح يا ماما أذاكر معاه .

فقالت زينب:

_ طب ما تذاكر هنا .

ــفين ؟.. سامى وجيهان بيذاكروا فى الأوده ، السنه دى مش عايزه لعب دى الثانوية العامه .

_ والله أنا خايفه عليك .

ـــ بقى جيهان بتذاكر مع سامى وما حدش خايف عليها و خايفه على قانا أذاكر بره .

وخرج مهرولا وهبط الدرج يركب إلى جوار صديقه في السيارة وانطلقت بهما ، وعند شارع من شوارع القاهرة الهادئة وقفت السيارة وصعدت إليها فتاتان ثم انطلقت السيارة والضحكات تتجاوب في أرجائها .

وترك عاطف التلفزيون وذهب إلى أبيه وقال:

ـــالنهارده كان فيه روايه فى التلفزيون غريبه قوى خلصت من غير ما حد يتجوز فى آخرها .

وقالت له زينب :

ــ طب خش انت واختك وذاكروا بقى ، شايفين سامى بيذاكر ازاى ومراد خرج فى البرد ده عشان يذاكر ، كبدى عليه ح يموت نفسه فى المذاكره السنه دى .

بخار الماء يملأ الشقة وأحلام وجلال وحسين يغدون ويروحون فى قلق ، ومن شدة قلقهم يتبادلون حمل حسين الصغير كلما هم بالبكاء ، وارتفع صوت زينب قائلة :

_ ناولينا الميه السخنه يا أحلام .

وحملت أحلام الماء الساخن واتجهت به إلى الغرفة المغلقة ، وسرعان ما ارتفع بكاء المولود ، فخرجت زينب وقالت :

ـــ مبروك ولد .

وخرجت الدكتورة ودخل حسين وجلال وأحلام يباركون لنبيلة ، وسرعان ما خرجت أحلام يتبعها زوجها فقالت وقد ظهر الضيق في وجهها :

ـــ والنبي ابن خالك ده بايخ .

وهاجمت رأس جلال فكرة وما أسرع أن عزم على إنفاذها ، فحمل ابنه و خرج لا يلوى على شيء وانطلق إلى بيت ابن خاله ، فلما طرق الباب فتحه له شفيق ، فما أن رأى ابن جلال حتى بش وحمله و دخل و هو يداعبه ، فإذا بحسين الصغير يبتسم فيستشعر شفيق أن الكون كله قد

أشرق .

وجلس الرجلان و لا حديث بينهما فقد كان وجود الطفل أفصح من كل كلام ، فنهض شفيق وعاد يحمل شيكولاتة وقال لجلال :

_ ياكل شيكولاتة ؟

__ بياكل .

وقدم شفيق الشيكولاتة للطفل فراح يأكلها وقد لوث فمه ، فلما أتى عليها حمله شفيق وذهب إلى الحمام وراح يغسل له فمه والطفل يعبث بيده في الماء المنهمر من الصنبور .

وأحس شفيق مشاعر رقيقة . إن كل كآبة قد غسلت من صدره وانسكبت فيه عواطف ناعمة رقيقة حانية ، ولم يستطع أن يكبح جماح إحساساته فقال :

.... ابنك لطيف يا جلال .

ورى جلال أن يطرق الحديد وهو ساخن فقال:

_ نبيله جابت لك ولد ألطف منه .

فقال شفيق دون تفكير:

ـــ هي نبيله ولدت ؟

ـــ ولدت وجابت لك ولد ألطف من حسين .

ـــ مش معقول :

فقال له جلال وقد دنا منه.

ــ مش تعقل بقى وتسيب عناد الأطفال ده .

و لم يحر شفيق جوابا بل ضم إليه الطفل وقبله قبلة ترجمت عن التحول الهائل الذي طرأ عليه ، فقال له جلال :

ــ طب قوم بقى نروح لها .

فقال له شفيق وهو يبتسم:

ــ يعنى مش تيجي معايا لما ابيع العربيه .

فقال له جلال في انشراح:

ــ نويت ؟

فهز له شفيق رأسه أن نعم ، وانصرف الشابان وركبا السيارة لآخر مرة وانطلقا بها إلى محل بيع وشراء سيارات وقد غادراه بدونها .

. ودق جرس باب شقة حسين فهرعت سوسن وفتحت ، وما أن رأت جلال و شفيق حتى صاحت :

_ شفيق جه يا ماما .

وخف حسين لاستقبال زوج ابنته وهو يكاد يطير من الفرح، وجرى عاطف إلى نبيلة يزف إليها البشرى . وما أن وقعت عينا حسين على شفيق حتى اغرورقت عيناه بالدموع ولم يتمالك حتى عانقه . ومسح جلال من عينيه دمعة كبيرة انحدرت على خده ، وهرع الجميع إلى شفيق فرحين . إنهم يصافحونه مصافحة الغائب الذى عاد . واستقبلته زينب مرحبة :

_ أهلا .. أهلا وسهلا .. ادخل .. ادخل شوف ابنك . ودخل شفيق ، وما أن تلاقت عيناه بعيني نبيلة حتى اغرورقت عيناه بالدموع وسحت نبيلة العبرات فقالت زينب :

_ ده مش وقت عياط.

وخطفت أحلام ابنها من أبيه وراحت تقبله لتنفس عن العواطف المكبوتة في صدرها ، فلو طاوعت نفسها لأجهشت بالبكاء .

و جاء سامي يداغب شفيق فقال:

ــ والله كبرنا وبقى لنا أولاد .

فقال له شفيق:

_ عقبالك لما تبقى راجل زينا .

وجاء مراد وقال:

_ الجو لذيذ قوى .

فقالت له أحلام:

_ وانت اش عرفك ؟

وانسل مراد دون أن ينبس بكلمة ، ومالت زينب وحملت المولود وقدمته إلى أبيه ، فحمله شفيق وقد انداحت رقة في جنباته وظل يرنو إليه في حب عميق ، فقالت له نبيلة :

_ مش حلو ؟

فقال في صدق:

ـــ ما فيش أجمل من كده .

فقال سامي:

ــ خنفسة شافت ولادها على الحيط ، قالت ما أحلى ولادى زى ــ الحفيد)

اللولى في خيط .

فقالت أحلام:

ــ ده والنبي كله انت .

فقال سامي:

_ هو انا وحش كده ؟

فقالت نبيلة:

ــ يا ريتك كنت حلو زيه .

وجاءت زينب بفنجان مغات وقدمته إليه وقالت:

__ اتفضل .

فأعاد شفيق ابنه إلى جوار أمه وتناول الفنجان ، وقالت له زينب :

_ خلاص ، افضل معانا لغاية « السبوع » .

_ متشكر ، أنا السبوع ح اعمله في بيتنا .

وازدرد حسين ريقه ، فما كان يحتمل حدوث ما حدث يوم « سبوع » ابن أحلام ، وما انتهى شفيق من شرب المغات حتى عاد يحمل ابنه ، ثم التفت إلى حماه وقال :

__ ح اسميه حسين .

فقالت أحلام:

_ احنا سبقناك .

_ 175_

فقال شفيق :

_ وفيها إيه ، ابنكم اسمه حسين جلال وانا ابنسى اسمه حسين شفيق .

وطغت عواطف حسين فذهب إلى شفيق واعتنقه .

كان جلال وأحلام يدفعان عربة ابهما أمامهما وإلى جوارهما يسير شفيق ونبيلة يدفعان عربة أخرى بها ابنهما . كان الجو لطيفا والطريق هادئا وكانت المشاعر التي تفيض بها النفوس . وساد الصمت بينهم فكل منهم كان ينعم بالانشراح الروحي الذي جعله يحس أنه يهيم في ملكوت من لطف وسحر وجمال .

وأراد جلال أن يقطع الصمت الذي لفهم فالتفت إلى شفيق وقال:

_ أنهين ألذ ، سواقة العربية والا زق العربيه ؟

فدفع شفيق عربة ابنه أمامه وقال:

_ زق العربيه ألذ .

فقال جلال مداعبا نبيلة:

_ خلاص تيجي له أخت .

فقالت نبيلة في تصنع:

_ توبه ، كفايه واحد ، هو احنا قادرين عليه .

وقال شفيق:

_ ده قاطع أبونيه عند الدكتور من يوم ما جه ، وعبال ما نلاقي علبة

اللبن بندوخ .

وقالت نبيله في إشفاق :

ـــ الله یکون فی عون ماما . أنا عارفه ربتنا ازای .

ولم يعجب ذلك الكلام أحلام فقالت:

_ أنا ح اجيب له أخ واللا أخت ، لو فضل وحده ح يطلع أناني . فقال شفيق :

_ أنانى أنانى بس كفايه على كده .

وقالت أحلام لأختها :

_ إلا يا نبيله لما ح تتوظفي ح تعملي فيه إيه ؟

ــ ح اسيبه عند ماما الصبح ولما ارجع ابقى آخده .

فقالت أحلام:

ـــ تفتکری الماهیه اللی ح تاخدیها تستاهل المرمطه دی کلها ؟ ح تدوّیی بها جزم و شربات و ح ترکبی بها تاکسیات .

فقال شفيق:

ـــ انتى متفائله قوى ، هى فين التاكسيات دى ؟

وقالت أحلام وقد ذهبت لتغطى ابنها جيدا بينا جلال يدفع العربة :

_ لو الحكومه تنصف كانت قالت : الست المتجوزه و مخلفه تقعد في

البيت وندى لجوزها نص ماهيتها .

فقالت نبيلة معترضة :

ـــ وليه ما تاخودهاش هي ؟

__ ياحدها هو تاحدها هي المهم إن الستات اللي متجوزين ومخلفين يقعدوا يربوا اولادهم ، تربيه الأولاد أهم من الشغل اللي بيشتغلوه ده إن كانوا بيشتغلوا حاجه . دى زيادة عن إن أزمة المواصلات ح تتحل ، وإن الدوله ح توفر الفلوس اللي بتشترى بيها كاليات وتواليتات للستات اللي بيشتغلوا و يخرجوا كل يوم .

ومرت الأيام وخرج حسين مع أحفاده ، قصد حديقة من الحدائق وسار فى يده حسين جلال وحسين شفيق وفى يده الأخرى زينب الصغرى ابنة أحلام ، إنه كان سعيدا يستشعر أن شبابه قد عاد إليه وأن الدنيا تبتسم له .

ومرت الشهور وخرج جلال وزوجته وشفيق وزوجته للنزهة .

كان جلال قد أمسك ابنه حسين فى يد وفى يده الأخرى زينب الصغيرة وأحلام تدفع العربة فيها وليده الثالث ، وسار شفيق وقد قبض على يد ابنه فهو يخشى أن يجرى ، فحسين شفيق لا يطيق أن يمشى الهوينى ، وقد دفعت نبيلة العربة وفيها مولودها الثانى ، والتفت إليها جلال وقال :

- _ البنت التالته سميها أحلام.
 - ـــــ لأ يا خويا كفايه .
 - _ ما انتى ئفسك فى بنت .
 - فقالت نبيلة وهي تضحك :
- ـــ دول عايزين أب سعيد وأم حديد .

فقال جلال مداعبا شفيق:

ـــ خلاص ا أبوهم غنى وامهم عيني بارده عليها .

فقال شفيق:

ـــالقرشين طاروا والشكوى لغير الله مذلة ، ده احنا لو جبنا التالت ح نقف على باب سيدنا الحسين ونقول لله .

فقال له جلال:

بيا راجل قول الحمد لله . انت بتشتغل ونبيله بتشتغل .

وقالت أحلام :

ـــ وبترمي اولادها على امها .

وتصرمت أشهر وانقضى عام ، ورن الجرس فى بسيت حسين ، فأسرعت زينب وفتحت وإذا بنبيلة قد جاءت بأولادها الثلاثة وقالت زينب لأحفادها :

ــ أهلا .. أهلا بالحلوين .

وانسلت نبيلة وهي تقول:

ــ يمكن اتأخر فى الشغل النهارده .

ــ على مهلك يا بنتي .

... معلهش ، أنا عارفه إنهم بيتعبوكي .

ـــ أبدا يا نبيله .

ودخلت زينب بعد أن حملت الصغيرة التي كانت على كتف ابنتها وقالت لحفيدها :

_ حسين امسك إيد اخوك وتعالى .

وسارت وأجلست الطفلين وقالت لهما:

_ خليكو هنا لما أشوف لكم كل واحد بيضه .

ودخلت إلى المطبخ وهى تحمل حفيدتها وتداعبها ، وما لبثت أن سمعت جرس الباب فقالت وهى تضع البيض على النار :

ـــ حاضر .. جايه .. جايه اهو .

وفتحت الباب فإذا بجيهان تحمل ابنتها على كتفها :

_ لا مؤاخذه يا تانت ، والنبى تخلى بنتى مع اولاد نبيله لغاية ما اخلص الامتحان ، هانت آخر امتحان .. أصل جوزى سافر امبارح .

_ من عینی یا جیهان . قعدیها معاهم .

ودخلت جيهان وأجلست ابنتها مع حسين الصغير وأخيه ، فمال حسين وقبلها .

فقالت زينب:

_ لايقين لبعض . مش كده يا جيهان ؟

فابتسمت جيهان وقالت :

_ خلاص يا تانت ، خدوها من دلوقت .

ــــ ربنا يهنيكى بيها .

وقالت جيهان :

_ هو سامي خرج ؟

ـــ خرج من بدری .

ــ ادعى لنا يا تانت .

ــــربنا ينجح مقصودكم يا بنتي .

وانصرفت جيهان ، وعادت زينب إلى المطبخ فألفت الماء يسغلى والبيض يتحرك في الإناء من شدة البخار ، فأطفأت النار وأخذت البيض وذهبت إلى حيث كان الأطفال وجلست على الأرض وقشرت أول بيضة ، فأخذها حسين فإذا بأخيه يستاء فقالت له :

_ معلهش ، ح اديك البيضه اللي باقشرها دى .

ومدت ابنة جيهان يدها وقبضت على بيضة كانت فى الطبق ، فإذا بها تصرخ ، كانت البيضة لا تزال ساخنة . وفزعت ابنة نبيلة فبكت لبكاء ابنة جيهان . ولما رأى حسين وأخوه بكاء أختهما انخرطا فى البكاء وراحت زينب تحاول إسكات الأطفال الثلاثة دون جدوى ، صفقت لهم . . انشالت وانحطت فى مكانها كالقرد ، أصدرت أصواتا لعل الأطفال ينشغلون بها عن البكاء ، صنعت كل ما فى طاقتها دون جدوى ، وظل البكاء مستمرا بل ازداد كأنما البكاء يجلب البكاء ، ونفد صبر زينب فقالت فى غضب ويأس :

ـــ بقی یا رہی هم یزربوا وتیجی علی راسی انا ؟!

مرت خمس عشرة سنة منذ زفاف أحلام ، وكان حسين في غرفة النوم شاردا .. يعجب كيف انقضت سريعا كل تلك السنين . إنه سيبلغ سن الستين بعد أيام ، سن التقاعد ، وهو لا يدرى ماذا ستكون حياته بعد ذلك ، وقد اعتاد أن يخرج في الصباح ويتجه إلى مكتبه ويمكث به حتى متنتصف الثانية بعد الظهر ، وكثيرا ما كان يعود إليه في المساء .

صار مكتبه قطعة منه يحز في نفسه أن يفارقه بعد صحبة السنين الطويلة . إنه وإن كان جمادا إلا أنه كان بالنسبة إليه أكثر حياة من كثير ممن عرفهم وممن مروا في حياته مر الكرام . ويا طالما شهد ذلك المكتب أيام بهجته وأيام سروره وأيام ضيقه ، فبين جدرانه جرت أحلى الذكريات .

ولمحت زينب الأسى في وجه زوجها فقالت له :

ـــ بتفكر في إيه يا حسين ؟

فقال حسين وهو يبتسم ابتسامة مريرة :

__ ح يبقى عندى ستين سنة بعد اربع تيام .

فقالت زينب:

ــــ ربنا يديلك طولة العمر ، أبويا عاش لما بقى عنده تمانين .

ولم يكن بلوغه سن الستين هو الذي يشغله إنما كان يشغله أنه لن يذهب إلى مكتبه ، ليتهم يسمحون له بأن يذهب إليه بعد التقاعد دون أن يتقاضى شيئا فوق معاشه . إن ما يحز في نفسه أنه سيفقد عادته ، وإنه لمن الصعب أن يعتاد المرء على شيء لم يألفه من قبل بعد الستين ، فقال :

_ ح اتحال ع المعاش يا زينب .

ـــ الحمد لله ، لا عندنا اللي بيعيط ولا عندنا اللي بيوقوق ، خلصنا ذمتنا منهم كلهم .

ولمعت في ذهنها فكرة فقالت :

_ انت طول عمرك مهنينا ، لازم نحتفل بك .

فقال حسين في خوف:

... لأيا زينب ، ما فيش لازمه .

صرفت علينا كلناح تبخل على نفسك ؟

و تردد وأخيرا رأى ألا مفر من أن يقولها:

ـــ لازم يا زينب نمسك إيدينا ، انتي عارفه المعاش يعني إيه .

ـــ راضيين والحمد لله ، وهو لما نحتفل بيك لازم نبعزق ، ح نعزم الأولاد ع الغدا واللا العشا ، ويوم ما يبقوا كلهم حوالينا يبقى يوم عيد .

_ احنا دلوقت يا زينب ما نقدرش نكفيهم عيش .

_ الخير كتير ، والنبي لانفرح بيك زي ما فرحتنا كلنا .

ويوم أتم السَّتين اجتمعت الأسرة حول المائدة ، إنها لم تعد أسرة بل صارت قبيلة ، ومدت المائدة حتى وصلت إلى الغرفة التمي كانت للبنات ، وجلس حسين على رأسها ، وعن يساره شفيق وخمسة أبناء ، وبعدهم جلست نبيلة ، وجلس سامى وبعده ولدان ثم زوجته ، ثم سوسن وابنتها وزوجها ، وعن يمينه جلس جلال وثلاثة أبناء ثم أحلام ، وبعد أحلام جلس مراد وابنه وزوجه ، ثم هالة وزوجها ، وجلس عاطف وحده فلم يتزوج بعد .

وجاءت زينب من المطبخ تحمل حلة كبيرة بها مغرفة ، فلما رآها الأحفاد صاحوا :

ــ تيتا .. تيتا .. تعيش تيتا .

وقالت وينب لتغريهم على التزام الصمت :

ــ اللي ح ياكل وهو ساكت جدو ح ياحده الملاهي .

وراحت تغرف من الحلة وتضع في الصحاف الموضوعة أمام الجميع ،

فإذا وصلت إلى هالة قالت لها :

ــ خدى بالك من جوزك يا هاله .

وإذا غرفت لمراد وابنه وزوجته قالت :

ـــأكّل ابنك ومراتك يا مراد .

وغرفت لأحلام وقالت لها :

_ مش ح اوصيكى على اولادك يا أحلام .

وغرفت لجلال وقالت:

ــ يعجبني جلال . مش عايز حد يأكله .

ووصلت إلى زوجها فغرفت له وقالت :

ــ ربنا يخليك لنا ميت سنه .

وغرفت لشفيق ولأولاده الخمسة ولنبيلة ثم قالت لها:

ــ شدى حيلك يا نبيلة ح تبقى عيله زينا .

فقال جلال مازحا:

_ قصدك قبيله ..

وابتسم حسين فابتسم الجميع ، وغرفت لسامي وقالت له :

ـــ أوعى تاكل أكل ولادك يا سامى .

وراحت تغرف لولديه ولزوجته .

وغرفت لسوسن وهي تقول:

_ مین کان یصدق ان سوسن ح تکبر ویبقی لها بنت .

وقالت أحلام :

... اقعدى بقى يا ماما .

فقالت زينب وقد أفرغت الحلة وانطلقت صوب المطبخ :

ـــ لما اجيب لكو المكرونه .

وغابت قليلا ثم عادت تحمل صاجا أشبه بصاج المكرونة في محال السندويتشات ، وصاح الأحفاد :

ــ تيتا .. تيتا .

ــ اللي ح ياكل وهو ساكت ح ياخده جدو الملاهي .

* * *

وانطلق حسين في رفقة أحفاده إلى الملاهي ، وذهب إلى الشباك

وقال :

ـــ اتناشر تذكره .

فنظر الرجل إلى الأولاد ، ثم رمق حسين في إشفاق وقال :

ــ كفايه تسعه .

وتناول التذاكر واتجه إلى الباب. فإذا بالرجل الواقف عند الباب يلقى نظرة إشفاق على الأولاد ويرق قلبه لحسين فيأخذ منه التذاكر ، ثم ينطلق إلى شباك الحجز ويعيد ثلاث تذاكر ثم يقفل عائدا إلى حسين ويعطيه ثمن التذاكر التي ردت ويقول له :

ـــ كفايه سته .

ويدخل الأحفاد إلى الملاهي ويجرون هنا وهناك فيصيح حسين :

- حسين جلال .. حسين شفيق .. خلوا بالكو من انحواتكم ومن الأولاد .

فرد عليه أحدهم:

ـــ استریح انت عندك وح نبقى نیجي لك .

وذهب حسين وجلس على مقعد وغفا ، وانتشر الأحفاد في الدنيا الضيقة ـــ وما أسرع ما سينتشرون في الدنيا الواسعة ، في أرض الله .

مؤلفات الأستاذ عبد الحميد جودة السحار

	_ أحمس بطل الاستقلال
ترجم إلى الاندونيسية	_ أبو ذر الغفاري
	ـــ بلال مؤذن الرسول
(مجموعة أقاصيص)	ـــ في الوظيفة
•	ـــ سعد بن أبي وقاص
(مجموعة أقاصيص)	_ ممزات الشياطين
	_ أبناء أبى بكر الصديق
(رواية)	ـــ في قافلة الزمان
(قصة)	ــــــ أميرة قرطبة
(نصة)	ــــ النقاب الأزرق
	ــــ المسيح عيسى بن مريم
t a sale of Acre	أهل بيت النبي
مد رسول الله تألیف : مولای محمد علی	
رجمة بالاشتراك مع مصطفى فهمي أور	
(مجموعة أقاصيص) 	_ قصص من الكتب المقدسة
(مجموعة أقاصيص) معمومة العالان معمومة	صدى السنين
ترجمت إلى الاندونيسية	
. 41	حياة الحسين
(رواية) د ترية ،	_ الشارع الجديد
(قصة) د تا تا	وکان مساء *.
(قصة) د تمانا	أذرع وسيقان
(قصة) د ما متأتاه ما	ــ المستنقع
(مجموعة أقاصيص) د ما ت	ليلة عاصفة
(رواية) (قصة)	الحصاد
(نصبه)	جسر الشيطان

(قصة)	ـــ النصف الآخر
(رواية)	ــ السهول البيض
(قصة)	ـــ أم العروسة
(قصة)	قلعة الأبطال
	ـــ و عد الله وإسرائيل
	ــ عمر بن عبد العزيز
	_ هذه حیاتی
,	الحفيد
	ــ ذكريات سينمائية
	ــ كشك الموسيقى
	ــ خفقات قلب
	- صور وذکریات داده
	ـــ الإسراء والمعراج
	ـــ القصة من خلال تجاربي الداتية
	ـــ عدو البشر
	ـــ أبطال الجزيرة الخضراء ".
	ـــــــ الثمر ريخ رســــــــــــــــــــــــــــــــــــ
	ـــ الله اكبر
	ــ ثلاثة رجال في حياتها
	ـــ مسجد الرسول تدم دار د
	سد فات الميعاد آدر السامي
	ـــ آدم إلى الأبد المرابع في الأبد
	ــــ العرب في أوربا
	ـــ الدستور من القرآن العظيم

رقم الإيداع ٣٤٢٨ الترقيم الدولي ٧ — ١٤٤ -- ٣١٦ — ٩٧٧





مكت بيمص ٣ شاع كامل شدقي - الغجالة

دار مصر للطباعة معد جوده السعار وشركاه الشمن ٣٢٥ قرشا